

YEMA CUÁÜ NÜXÜ DAUXÜ I YIXCÜRA TÁ NGUPETÜXÜCHIGA

Ore ga Cuáüxü nüxü nacuèxëxü ga Ngechuchu ga Cristu

¹ Ñaã nixĩ i ngẽma ore ga Tupana Ngechuchu ya Cristuxü nüxü cuèxëxü na nüxĩ norü duüxügüxü nüxü nacuèxëxücèx i ngẽma paxa tá ngupetüxü. Rü nüma ga Ngechuchu ya Cristu nixĩ ga norü ore-arü ngeruü ga daxücüãxü namuxü na norü duücü ga Cuáümaã nüxü na yaxuxücèx. ² Rü choma i Cuáü chixĩ ga aixcüma meãma nüxü chadauxü rü chanaxümatüxü ga guxüma ga yema Tupanaãrü ore ga Ngechuchu chauxcèx ngoxëxü. ³ Rü tataãe ya yixema duüxügüpëxewa nawa ngúxe i ñaã Tupanaãrü ore, rü ngëxgumarüü ta tataãëgü ya yixema nüxü ñnüëxë rü naga ñnüëxë i ñaã ore i ümatüxü, erü paxa tá ningu i ngẽma nüxü yaxuxü.

Cuáü nanaxümatü naxcèx ga yema 7 tücumü ga yaxögüxü ga Áchiaanewa yexmagüxü

⁴ Rü choma i Cuáü rü chanaxümatü i ñaã ore pexcèx i yaxögüxe ya yima 7 ya ñãne ya Áchiaarü naãnewa ngëxmagünewa ngëxmagüxe. Rü chanaxwèxe i pexü narüngüxëë rü pexü nataãëxëë ya yima Tupana ya woetama ngëxmaëchacü. Rü ngëxgumarüü ta chanaxwèxe i pexü narüngüxëë rü pexü nataãëxëë i ngẽma Naãe i Üünexü i naxütawa ne üxü i perü dauruü ixixü i pema i yaxögüxe

ya yima 7 ya ñãnewa na pengẽxmagüxũ. ⁵ Rũ ngẽxgumarũũ ta chanaxwèxe na pexũ nangüxẽẽxũ rũ pexũ nataãẽxẽẽxũ ya Ngechuchu ya Cristu ga aixcũma meãma nüxũ ixucü ga Tupanaãrũ ore ga ñoma ga naãnewa. Rũ nüma nixĩ ga nüxĩra yuwa ñadaxũ. Rũ nüma rũ guxũma i ñoma i naãnewa ngẽxmagüxũ i nachiuãneãrũ ãẽxgacügüarũ ãẽxgacü nixĩ. Rũ nüma rũ tüxũ nangechaũ, rũ nagũmaã tüxũ inayanaxoxẽẽ i tórü pecadugü. ⁶ Rũ ñuxma na guxũãrũ ãẽxgacü yixũ i nümax, rũ tüxũ naxüchica i ngextá nüma ãẽxgacü iyixũwa. Rũ paigüxũ tüxũ nixĩgüxẽẽ na Nanatü ya Tupanaãxũ ipuracüexücèx rũ nüxũ icuèxüügüxücèx. Rũ name nixĩ i guxũgutáma Cristuxũ ticuèxüügü, erü nüma rũ guxũgutáma guxũãrũ ãẽxgacü nixĩ. Rũ ngẽmaãcü yii. ⁷ Rũ dücax, marü ningaica na caixanexügu ñanguxũ ya Cristu! Rũ guxũtáma i duũxügü nüxũ nadau, rũ woo ga yema nacanapacütüügüxũ rũ tá ta nüxũ nadaugü. Rũ guxũ i duũxügü i guxũ i nachiuãnecüãx i tama yaxögüxũ rũ norü muũmaã rũ norü ngechaũmaã tá naxauxe i ngẽxguma ñanguxgu i nümax. Rũ aixcũma ngẽmaãcü tá nixĩ. ⁸ Rũ nüma ya tórü Cori ya Tupana ya guxũãrũ ãẽxgacü ixícü ya woetama ngẽxmaẽchacü, rũ ñanagürü:

“Chowa nixĩ ga inaxügüxũ ga guxũma, rũ nataxuma i tacü i chorü yexera ngẽxmaẽchaxũ”, ñanagürü.

Cuáüçèx nangox ga Cristu ya mexèchicü

⁹ Rũ choma i Cuáü na pexcèx chanaxümatüxũ i ñaã popera, rũ peeneẽ chixĩ. Rũ ngẽma na

Ngechuchuna na chaxüxü rü chaxãchica i ngextá nûma ãëxgacü íyíxüwa. Rü Ngechuchucèx pexrüü ngúxü chinge, natürü nûma pexü naporaexëëxürüü choxü naporaxëë na yaxna namaã chaxĩnücèx i guxüma i ngëma ngúxü i choxü üpetüxü. Rü choma rü capaxü ga Pátmugu chapoxcu naxcèx na nüxü chixuxü ga Tupanaärü ore ga Ngechuchuchiga. ¹⁰⁻¹¹ Rü wüxi ga yüxüarü ngunexügu rü Tupanaãë i Üünexü chomaã inacuèx, rü changoxetü rü choweama nüxü chaxĩnü ga wüxi ga naga ga tagaxü ga ñoma cornetagarüü ixixü ga ñaxü choxü:

“Chowa nixĩ ga inaxügüxü ga guxüma, rü nataxuma i tacü i chorü yexera ngëxmaëchaxü. Rü ñuxma chanaxwëxe na wüxi i poperagu cunaxümatüxü i ngëma nüxü cudauxü. Rü ñuxüchi chanaxwëxe i ngëma yaxögüxü ya yima 7 ya ããne ya Áchiaarü naãnewa ngëxmagünewa ngëxmagüxütanüwa cunamu. Rü yima 7 ya ããne nixĩ ya Epéchiu rü Esmira rü Pérgamu, rü Tiatíra rü Chardi rü Firadérfia rü Laodichéa”, ñanagürü. ¹² Rü chaugü íchidau na nüxü chacuáxücèx na tacü yíixü ga yema chomaã idexaxü. Rü yexguma chaugü íchidëuxgu rü nüxü chadau ga 7 ga weraarü üruügü ga uirunaxcèx ixígüxü. ¹³ Rü yema 7 ga weraarü üruügüarü ngãxütanüwa nüxü chadau ga wüxi ga duüxü ga chauxcèx nangechuchu ga duüxüxü ixícüraüxü. Rü wüxi ga naxchiru ga máxümaã naxãxchiru. Rü wüxi ga goyexü ga uirunaxcèxmaã nigoyeremü. ¹⁴ Rü nayae rü nachoxochi ñoma tacü i choxochixürüü. Rü naxëtü rü ñoma üxüemarüü niyauracüü. ¹⁵ Rü

nacutü rü ta niyauracüü ñoma cobrexüchi i meãma ípíxürüü. Rü yexguma yadexagu rü natagaxüchi ñoma taxü i dexá i chuxchuxü ägaxürüü. ¹⁶ Rü norü tügünemëxëwa nüxü nayexma ga 7 ga woramacurigü. Rü naãxwa nayexma ga wüxi ga tara ga guxücüwawa téxü. Rü nachiwe rü ñoma üèxcü poraãcü nguxetügurüü nixí. ¹⁷ Rü yexguma nüxü chadèuxgu, rü napëxegu chayangu ñoma chayuxürüü. Natürü ga nüma rü norü tügünemëxëmaã choxü ningögü, rü ñanagürü choxü:

“¡Tãxü i cumuüxü! Choma nixí i chaxira chayexmaxü rü guxügutáma changëxmaëchaxü. ¹⁸ Rü choma nixí i yuwa ícharüdaxü rü ñuxma rü chamaxü. Rü üpa rü chayü, natürü i ñuxma rü marü guxügutáma chamaxëcha. Rü choxmëxwa nangëxma na ñuxgu tá nayuxü i wüxichigü i duüxü. Rü ngëxgumarüü ta choma nixí i namaã ichacuáxü i ngëma nachica i ngextá ínangëxmagüxüwa i guxüma i duüxügü i yuexü. ¹⁹ Rü ñuxma rü chanaxwëxe i cunaxümatü i ngëma nüxü cudauxü. Rü ngëma nixí i ñuxma ngëma yaxögüxümaã ngupetüxü, rü ngëma yixcüra tá ngupetüxü. ²⁰ Rü ñuxma rü tá cuxcèx chanangoxëë i ngëma ëxügüxü i ngëma 7 i woramacurigü i chorü tügünemëxëwa nüxü cudauxüchiga rü ngëma 7 i weraarü üruüğü i uirunaxcèxchiga. Rü ngëma 7 i woramacurigü i nüxü cudauxü, rü ngëma äëxgacügü i ngëma 7 tücumü i yaxögüxüetüwa ngëxmagüxüchiga nixí. Rü ngëma 7 i weraarü üruüğü rü ngëma 7 tücumü i yaxögüxü i yima 7 ya ñãnewa ngëxmagüxüchiga nixí”.

2

*Ore ga yema 7 tücumü ga yaxõgüxüçèx ümatüxü
Ore ga yema yaxõgüxü ga Epéchiuarü ãñewa yex-
magüxüçèx ümatüxü*

¹ “Rü ñuxma chanaxwèxe i ngêma Epéchiuwa ngêxmagüxü i yaxõgüxüârü ãñexgacüçèx cunaxümatü, rü ñacurügü nüxü: ‘Ñañ nixí i norü ore ya yima ngêma yaxõgüxütanügu yarüxüüçü rü norü tügünemêxêmaã nüxna daucü i ngêma yaxõgüxüârü ãñexgacügü’.” ² Rü ñanagürü i nümax:

‘Choma nüxü chacuèx i guxüma i ngêma cuxüxü. Rü nüxü chacuèx na ñuxäcü poraäcü choxü cupuracüxü rü ñuxäcü cunaxüamaxü i ngêma puracü woo ngêmacèx muxüma i guxchaxügü cuxçèx ínguxgu. Rü nüxü chacuèx na tama curü me yíixü i ngêma duüxügü i chixexü ügüxü. Rü ngêxgumarüü ta nüxü chacuèx na meã cunangugüarü maxüãxü i ngêma duüxügü i nügü ixugüxü na Tupana imugüxü yixígüxü natürü tama aixcüma ixígüxü na Tupana yamugüxü. Rü cuma rü nüxü cucuèxama na idoratèèxmaregüxü yixígüxü. ³ Rü woo naguxcha i ngêma puracü i chauxçèx cuxüxü, natürü cunaxüama. Rü woo chaugagu poraäcü ngüxü na quingexü, natürü yaxna namaã cuxínü, rü tama nüxü curüchau. ⁴ Natürü nangêxma i wüxi i cuxüxü i tama chorü me ixíxü. Rü ngêma nixí na tama noxrirüü choxü cungechaüxü i ñuxmax. ⁵ Rü ngêmacèx i ñuxma na ngêma chixexügu cunguxü, rü name nixí i nüxna cucuèxãchi na ñuxäcü choxü cungechaüxü ga noxrix. Rü name nixí i nüxü curüxo i curü chixexü rü noxrirüü choxü cungechaüãcüma mexü cuxü. Natürü ngêxguma

chi tama nüxũ curüxoxgu i curü chixexũ, rü paxa tá cuxũ íchayadau, rü tá cuxũ chaxo na tama ngẽma togü i yaxõgũxũtanüwa cuxãchicaxũcèx. ⁶ Natürü nangẽxma i wüxi i cuxũxũ i chorü me ixĩxũ. Rü ngẽma nixĩ na naxchi cuxaixũ i ngẽma chixexũ i naxügũxũ i ngẽma Nicoraítagü. Rü choma rü ta naxchi chaxai i ngẽma chixexũ i naxügũxũ'. ⁷ Rü yíxema ãchixexẽ rü name nixĩ i naga taxĩnü i ngẽma Tupanaãẽ i Üünexũ nüxũ ixuxũ namaã i ngẽma yaxõgũxũtücümügü". Rü ñanagürü:

“Yíxema nüxũ rüporamaẽxẽ i chixexũ rü tá tüxũ nüxũ chamuxnetaxẽẽ i norü o i ngẽma orix i tüxũ maxẽxẽxũ i Tupanaãrũ orixnecüwa ngẽxmaxũ”, ñanagürü i Naãẽ i Üünexũ.

Ore ga yema yaxõgũxũ ga Esmiraarũ ãñewa yexmagũxũcèx ümatũxũ

⁸ Rü yema chomaã idexaxũ rü ñanagürü ta:

“Chanaxwèxe i Esmirawa ngẽxmagũxũ i yaxõgũxũãrũ ãẽxgacücèx cunaxümatü, rü ñacurügü tá: ‘Ñãã nixĩ i norü ore ya yima nüxĩra yexmacü rü guxũguma ngẽxmaẽchacü ga paxaãchi yucü rü wenaxarü maxũcü’. ⁹ Rü ñanagürü i nümax:

‘Choma nüxũ chacuèx i guxũma i ngẽma cuxũxũ. Rü nüxũ chacuèx na ñuxãcü ngúxũ quingexũ. Rü nüxũ chacuèx na cungearü dñeruãxũ i ñoma i naãnewa, natürü daxũguxũ i naãnewa cuxũ nangẽxma i ngẽma taguma gúxũ. Rü nüxũ chacuèx na ñuxãcü chixri cuchiga yadexagũxũ i ngẽma duũxũgü i nügü ixugũxũ na Yudíugü yixĩgũxũ. Natürü i nümagü rü aixcüma Chatanáãrũ duũxũgümare nixĩgü. ¹⁰ ;Rü tãxũ i

cumuñxũ naxcèx i ngẽma ngúxũ i tá quingexũ! Rũ ngoxo i Chataná rũ tá norũ duñxũgũxũ namu na poxcupataũgu pexũ napoxcuexũcèx i ñuxre i pema na ngẽmaãcũ pexũ naxũxũcèx. Rũ ñuxre i ngunexũ tá ngúxũ pingegũ. Natürũ woo ngẽmaãcũ ngúxũ pingegũgu rũ chanaxwèxe i choxũ cuyaxõõma ñuxmatáta cuyux. Rũ choma rũ tá cuxna chanaxã i curũ ãmare i maxũ i taguma gúxũ'. ¹¹ Rũ yíxema ãchixexẽ rũ name nixĩ i naga taxĩnü i ngẽma Tupanaãẽ i Üünexũ nüxũ ixuxũ namaã i ngẽma yaxõgũxũtücumügũ". Rũ ñanagürũ: "Yíxema ñoma i naãnewa nüxũ rüporamaẽxẽ i chixexũ, rũ tãütáma Tupana ngoxogũxũ ípoxcuexũwa tũxũ nawogũ", ñanagürũ i Naãẽ i Üünexũ.

Ore ga yema yaxõgũxũ ga Pérgamuãrũ iãnewa yexmagũxũcèx ùmatũxũ

¹² Rũ yema chomaã idexaxũ rũ ñanagürũ ta:

"Chanaxwèxe i Pérgamuwa ngẽxmagũxũ i yaxõgũxũãrũ ãẽxgacücèx cunaxümatũ, rũ ñacurügũ tá: 'Ñaã nixĩ i norũ ore ya yima nüxũ nangẽxmacũ i ngẽma tara i guxũcüwawa téxũ'.

¹³ Rũ ñanagürũ i nümax:

'Choma nüxũ chacuèx na yima iãne ya Chataná poraãcũ namaã ícuáxũnewa na cumaxũxũ. Natürũ woo ngẽxma na cuxãchiũxũ, rũ tama choxũ ícutèx. Rũ woo yexguma chorũ orearũ uruũ ga mecũ ga Atípaxũ yamèxgũgu nagu ga guma iãne ga nawa Chataná duñxũgũmaã ícuáxũne, rũ tama nüxũ curũxo na choxũ cuyaxõõmaxũ.

¹⁴ Natürũ nangẽxma i ñuxre i tacũ i cuxũxũ i tama chorũ me ixĩxũ. Rũ ngẽma nixĩ na cugũxũtawa cunangẽxmagũxẽxũ i ñuxre i curũ duñxũgũ i tama

nüxü rüxoechaüxü i ngẽma nguxẽẽtae ga nuxcüma Baráü Yudíugüarü ãẽxgacü ga Baráü namaã ucuxẽxü na chixexügu Yudíugüxü nayixẽẽxüçèx. Rü yema Yudíugü rü yema ucuxẽgagu nawa naxí ga yema petagü ga togü ügüxü naxcèx ga norü tupananetachicünèxãgü. Rü yexgumarüü ta yema ucuxẽgagu nixí ga naí ga ngemaã namaxẽxü ga Yudíugü. Rü ñuxma i ñuxre i curü duüxügü i Pérgamuwa ngẽxmagüxü rü nagu naxí ga yema nuxcümaüxü ga nguxẽẽtae ga chixexü, rü tama nüxü narüxoechaü. ¹⁵ Rü ngẽxgumarüü ta ngẽma cunangẽxmagüxẽẽ i ñuxre i duüxügü i tama nüxü rüxoechaüxü i ngẽma Nicoraítagüarü nguxẽẽtae i Baráüarü nguxẽẽtaeruü chixexü. ¹⁶ Rü ngẽmacèx chanaxwèxe i nüxü curüxo i ngẽma chixexü. Rü ngẽxguma chi tama nüxü curüxoxgu, rü paxa tá ngẽma cuxütawa chaxü rü ngẽma tara i chauèxwa ngẽxmaxümaã tá ngẽma duüxügüxü chadai. ¹⁷ Rü yíxema áchixexè rü name nixí i naga taxínü i ngẽma Tupanaãẽ i Üünexü nüxü ixuxü namaã i ngẽma yaxõgüxütücumügü”. Rü ñanagürü:

“Yíxema nüxü rüporamaèxè i chixexü rü tá tüxna chanaxã i pãü i daxücüãx. Rü tá tüxna chanaxã ya wüxi ya nuta ya chócü i wüxi i naega i ngexwacaxüxü nagu ümatüxü. Rü yíxema nayaxuxexicatama tixí ya nüxü cuáxe i ngema naéga”, ñanagürü i Naãẽ i Üünexü.

Ore ga yema yaxõgüxü ga Tiatíraarü ãñewa yexmagüxüçèx ümatüxü

¹⁸ Rü yema chomaã idexaxü rü ñanagürü ta:

“Chanaxwèxe i Tiatírawa ngẽxmagüxü i yaxõgüxüãrü ãẽxgacüçèx cunaxümatü, rü

ñacurügü tá: 'Ñañ nixĩ i norü ore ya yima Tupana Nane ya ñoma üxüemarüü iyauraxetüçüçü rü nacutügü rü ñoma cobre i meãma ípixürüü ixĩxüne'. ¹⁹ Rü ñanagürü i nümax:

'Choma nüxü chacuèx i guxüma i ngẽma mexü i cuxüxü. Rü nüxü chacuèx na ñuxãcü cumüçügüxü cungechaüxü, rü ñuxãcü meãma choxü na cuyaxõxü, rü ñuxãcü nüxü na curüngüxëxü i ngẽma togü i yaxõgüxü, rü ñuxãcü yaxna namaã cuxĩnüxü i guxchaxügü. Rü nüxü chacuèx i ñuxma na noxriarü yexera cunaxüxü i ngẽma cuxü chanaxwèxexü. ²⁰ Natürü nangëxma i wüxi i cuxüxü i tama chorü me ixĩxü. Rü ngẽma nixĩ na ngema cunangëxmaxëëchaxü i ngẽma ngexü i Yechabé i nügü ixuxü na Tupanaärü orearü uruü na yĩxü, natürü norü nguxëëtaemaã chorü duüxügüxü ngema womüxëxü na chixri namaxëxüçèx, rü naĩ i ngemaã inapegüxüçèx, rü nangõxgüãxüçèx i ngẽma õnagü i togü norü tupanenetachicünèxãgüçèx dèixü na ngẽmamaã nüxü yacuèxüügüxüçèx. ²¹ Rü choma rü marü ngixü íchananguxëë rü yaxna ngĩmaã chaxĩnü na nüxü naxoxüçèx i ngẽma ngĩcüma i chixexü, natürü tama inaxwèxe na nüxü naxoxü rü ínataãxü i ngẽma ngĩrü chixexü i naxüxü. ²² Rü ñuxma i ngẽma nge rü tá ngixü chidaawexëë na ngĩrü ngürücarewa ngúxü yangexüçèx, rü ngẽma duüxügü i ngĩmaã ipexü i ngẽma nge rü nümagü rü tá ta ngúxü na yangegüxüçèx ega tama nüxü naxoegu i ngẽma chixexü i ngĩmaã naxügüxü. ²³ Rü tá chanadai i ngixãcügü i ngẽma nge. Rü ngẽmawa tá nüxü nacuèxgü i guxüma i yaxõgüxü na aixcüma nüxü chacuáxü

i ngẽma naãewa nagu naxĩnũxũ i wũxichigũ i duũxũ. Rũ wũxichigũ i pemax rũ tá pexũ chanaxũtanũ ngẽma na ñuxãcü pemaxẽxũãcüma rũ ñuxãcü penaxũxũãcüma. ²⁴⁻²⁵ Natürũ pemağũ i Tiatíracũãx i tama nagu ìxẽ i ngẽma ngexũãrũ nguxẽetae i chixexũ rũ taguma nawa ngúexe i ngẽma ore i togũ naxugũgu rũ Chatanáãrũ ore i ẽxũguxũ ixĩxũ, rũ pemaã nüxũ chixu rũ ngẽma pexũ chanaxwèxexũ nixĩ na meã namaã penguxũgũxũ rũ naga pexĩnüẽxũ i ngẽma chorũ ore ñuxmatáta íchangu i chomax. Rũ ngẽxĩcatama nixĩ i pexũ chanaxwèxexũ. ²⁶ Rũ yíxema nüxũ rüporamaẽgũxe i ngẽma chixexũ rũ naxũgũamaxẽ i ngẽma tũxũ chanaxwèxexũ ñuxmatáta tayuemare, rũ tá chaugũxũtawã tũxũ chaxũchica na wũxigu chomaã guxũãrũ ãẽxgacũ tixĩgũxũcèx. ²⁷ Rũ yema Chaunatũ ãẽxgacũxũ choxũ na ixĩxẽẽxũrũ tá tũxna chanaxã i porã na guxũ i nachiũãnegũmaã taporaexũcèx. Rũ ngẽxguma ñoma i naãnecũãx i duũxũgũ tama tũmaga ñnüẽgu rũ ñoma wũxi i tũxũ ngĩxũ ipuxẽẽxũrũ tá namaã tixĩgũ rũ porããcü tá tanapoxcue. ²⁸ Rũ tá tũxna chanaxã ya yima woramacuri ya pèxmama nüxũ idaucũ'. ²⁹ Rũ yíxema ãchixexẽ rũ name nixĩ i naga taxĩnü i ngẽma Tupanaãe i Üñexũ nüxũ ixuxũ namaã i ngẽma yaxõgũxũtũcumũgũ” ñanagürũ.

3

Ore ga yema yaxõgũxũ ga Chardiarũ ñãnewa yexmagũxũcèx ümatũxũ

¹ Rũ yema chomaã idexaxũ rũ ñanagürũ ta:

“Chanaxwèxe i Chardiwa ngẽxmagũxũ i yaxõgũxũãrũ ãẽxgacücèx cunaxümatü, rü ñacurügü tá: ‘Ñaa nixĩ i norü ore ya Tupana Nane ya Naãe i Üünexũ nawa ngẽxmacü ya yima 7 ya woramacuri nüxũ ngẽxmacü’. Rü ñanagürü i nümax: ‘Choma nüxũ chacuèx i guxũma i ngẽma cuxũxũ. Rü nüxũ chacuèx ta rü woo guxũwama duũxügü nüxũ ixugügu na Tupanacèx namaxẽxũ i ngẽma yaxõgũxũ i cuxũtawa ngẽxmagũxũ natürü tama aixcüma nixĩ i ngẽma, erü ngẽma yaxõgũxũ rü tama aixcüma choxũ nayaxõgü rü tama aixcüma chauxcèx namaxẽ. ² Rü name nixĩ i cubaixãchi rü cugü íquicuèx rü cuyangũxẽe i ngẽma íraxũ i mexũ i cuxũ íyaxũxũ i marü iyarüxoxchaũxũ. Erü nüxũ chadau rü ngẽma cuxũxũ rü tama Tupanapẽxewa name. ³ ;Rü nüxna nacuèxãchi ga yema nguxẽetae ga mexũ ga noxri nüxũ cuxĩnüxũ rü cuyaxuxũ, rü nagu ixũ! ;Rü nüxũ rüxo i ngẽma chixexũ i cuxũxũ! Natürü ngẽxguma tama nüxũ curüxoxgu i curü chixexũ, rü ñoma wüxi i ngĩtèxáxũ i ngürüãchi ínguxürüũ tá cuxũtawa chaxũ. Rü täütáma nüxũ cucuèx na ñuxguacü yĩxũ. ⁴ Natürü ngẽma Chardiwa cuxũ nangẽxma i ñuxre i duũxügü i mexũ i tama ñoma i naãneãrũ chixexũmaã nügü ãũãchiarü maxũãxgũxũ. Rü nümagü rü tá cómüxũmaã nixãxchiru rü ngẽmaãcü tá chomaã inaxĩ, erü nümagü rü duũxügü i mexũ i chauxcèx maxẽxũ nixĩgü. ⁵ Rü yixema nüxũ rüporamaẽgüxe i chixexũ, rü tá cómüxũmaã tixãxchiru. Rü täütáma nawa tüxũ íchapiéga i ngẽma chorü popera i nagu chayawügũxũ i ngẽma duũxügü i nüxũ nangẽxmaxũ i maxũ i taguma

gúxǔ. Rǔ Chaunatǔpǔxewa rǔ guxǔma i norǔ orearǔ ngeruǔgǔ i daxǔcǔǎǔxgǔpǔxewa tá tǔxǔ chixu na chorǔ duǔxǔgǔ tixǔgǔxǔ'. ⁶ Rǔ yǔxema āchixǔxǔ rǔ name nixǔ i naga taxǔnǔ i ngǔma Tupanaāǔ i Ūnǔxǔ nǔxǔ ixuxǔ namaā i ngǔma yaxǔgǔxǔtǔcumǔgǔ".

Ore ga yema yaxǔgǔxǔ ga Firadérfiarǔ ĩānewa yexmagǔxǔcǔx ũmatǔxǔ

⁷ Rǔ yema chomaā idexaxǔ rǔ ñanagǔrǔ ta:

“Chanaxwǔxe i Firedérfiawa ngǔxmagǔxǔ i yaxǔgǔxǔǎrǔ āǔxgacǔcǔx cunaxǔmatǔ rǔ ñacurǔgǔ tá: ‘Ñāā nixǔ i norǔ ore ya yima Ūnǔcǔ ya aixcǔma Cristu ixǔcǔ ya Dabǔrǔǔ āǔxgacǔ ya tacǔ ixǔcǔ ya nǔxǔ nangǔxmacǔ i pora na yawǎxnaāxǔcǔx rǔ nawǎxtaāxǔcǔx i daxǔguxǔ i naāne. Rǔ ngǔxguma texǔcǔx yawǎxnaāgu, rǔ taxucǔrǔwama texǔ tǔmachǔxwa tanawǎxta. Rǔ ngǔxguma texǔchǔxwa nawǎxtaāgu, rǔ taxucǔrǔwa texǔ tǔmacǔx tayawǎxna’. ⁸ Rǔ ñanagǔrǔ i nǔmax:

‘Choma nǔxǔ chacuǔx i guxǔma i ngǔma cuxǔxǔ. Rǔ dǔcax, cuxǔ chanatauxchaxǔǔ na togǔmaā nǔxǔ quixuxǔcǔx i chorǔ ore, rǔ taxucǔrǔwa texǔ cuxna tanachǔxu na cunaxǔxǔcǔx i ngǔma puracǔ. Rǔ choma nǔxǔ chacuǔx na tama aixcǔma cuporaxǔchixǔ, erǔ noxretama nixǔ i ngǔma yaxǔgǔxǔ i cuxǔtawa ngǔxmagǔxǔ. Natǔrǔ cuma rǔ naga cuxǔnǔ i chorǔ ore, rǔ tama icuyacǔx na chorǔ duǔxǔ quiǔxǔ. ⁹ Rǔ ngǔmacǔx i ngǔma duǔxǔgǔ i Chatanárǔ ixǔgǔxǔ i nǔgǔ ixugǔxǔ na chorǔ duǔxǔgǔ yixǔgǔxǔ natǔrǔ tama aixcǔma choxrǔ ixǔgǔxǔ, rǔ tá chanamu na cupǔxegu nacaxǔpǔxǔgǔxǔcǔx na nǔxǔ nacuǔxǔgǔxǔcǔx na

aixcüma cuxü changechaüxü. ¹⁰ Cuma rü meãma cuyanguxẽẽ i ngẽma cuxü chamuxü na aixcüma cuyaxõõmaxü naetüwa i ngẽma guxchaxüğü i cuxü ngupetüxü. Rü ngẽmacèx tá cuxü íchapoxü na tama cuxna nanguxüçèx i ngẽma guxchaxü i taxü i ñoma i naãnewa tá ínguxü na guxüma i ñoma i naãnecüãx i duüxüğüxü naxüxüçèx. ¹¹ Rü paxa tá ngẽma cuxütawa chaxü. Rü chanaxwèxe i ñuxma meã cumaxüxürüü meã cumaxecha, na taxüema cuxna napuxüçèx i ngẽma curü ãmare. ¹² Rü yíxema nüxü rüporamaëgüxe i guxüma i chixexü, rü Chaunatü ya Tupanaxütawa tá tüxü changëxmagüxẽẽ na tagutáma ngẽma ítachoxüxüçèx. Rü tümagu tá chanaxümatü i naega ya Chaunatü ya Tupana. Rü ngëxgumarüü tá ta tümagu chanaxümatü i naega ya Tupanaärü iãne ya Yerucharéü ya ngexwacaxüne ya Tupanaxütawa i daxüğüxü i naãnewa írüxixüne. Rü ngëxgumarüü tá ta tümagu chanaxümatü i chauéga i ngexwacaxüxü'. ¹³ Rü yíxema ãchixexë rü name nixí i naga taxĩnü i ngẽma Tupanaãë i Üünexü nüxü ixuxü namaã i ngẽma yaxõgüxütücumüğü".

Ore ga yema yaxõgüxü ga Laodichéawa yexmagüxüçèx ümatüxü

¹⁴ Rü yema chomaã idexaxü rü ñanagürü ta:

“Chanaxwèxe i Laodichéawa ngëxmagüxü i yaxõgüxüãrü ãëxgacüçèx cunaxümatü rü ñacurüğü tá: ‘Ñã nixí i norü ore ya yima aixcüma ixícü ya aixcüma yanguxẽẽcü i ngẽma nüxü yaxuxü rü ore i aixcüma ixixüxüxicatama ixucü. Rü nüma nixí

ga inaxügüãxũ ga guxũma ga yema Tupana üxũ'.

¹⁵ Rũ ñanagürü i nümax:

'Choma nüxũ chacuèx i guxũma i ngẽma cuxũxũ. Rũ nüxũ chacuèx na tama wüxi i duũxũ i chauxchi aixũ quiĩxũ, natürü tama wüxi i duũxũ i aixcũma choxũ ngechaũxũ quixĩ. Rũ chierü noxtacũma wüxi i duũxũ i chauxchi aixũ quixĩgu rü êxna noxtacũma wüxi i duũxũ i aixcũma choxũ ngechaũxũ quixĩgu. ¹⁶ Natürü ñuxma na írarüwatama choxũ cungechaũxũ, rü ngẽmacèx tá cuxũ íchatèx. Erü tama noxtacũma wüxi i duũxũ i chauxchi aixũ quixĩ rü tama noxtacũma wüxi i duũxũ i aixcũma choxũ ngechaũxũ quixĩ. ¹⁷ Rũ cuma cugü quixuxgu rü cumuãrũ dîeruãx, rü cumuãrũ ngẽmaxũãx, rü meãma cuxũ naxüpetü, rü taxuũma cuxũ nataxu. Natürü i cuma rü tama nüxna cucuèxãchi na chopèxewa rü wüxi i taxuwama mexũ quiĩxũ, rü wüxi i ngechaũxũchi quiĩxũ, rü wüxi i taxuũma cuxũ ngẽxmaxẽ quiĩxũ, rü ñoma wüxi i ngexetüxürüü quiĩxũ, rü ñoma wüxi i ngexchiruxürüü quiĩxũ. ¹⁸ Rũ ñuxma rü cuxũ chaxucuxẽ na chauxõtawa naxcèx cutaxexüçèx i uiru i marü üxüwa iguxũ i nüxĩcatama ixĩxũ. Rũ ngẽmaãcü tá aixcũma cuxũ nangẽxma i curü ngẽmaxũ. Rũ ngẽxgumarüü ta cuxũ chaxucuxẽ na chauxõtawa naxcèx cutaxexüçèx i cuxchiru i cómuxũ na ngẽmagu quicúxüçèx na taxúema cuxũ dauxüçèx na cungechiruxũ. Rũ ngẽxgumarüü ta cuxũ chaxucuxẽ na chauxõtawa naxcèx cutaxexüçèx i curü mèixètüxũ na curümexètüxüçèx na wena quidauchixüçèx. ¹⁹ Choma rü tüxũ chaxucuxẽ rü tüxũ ichayarüwèxãchixẽẽ ya guxãma ya yíxema tüxũ changechaũxẽ. Rũ ngẽmacèx name nixĩ i nüxũ curüxo i cucũma i chixexũ, rü

aixcūma choxũ cungechaũ rü cunaxü i ngēma cuxũ chanaxwèxexũ. ²⁰ Rũ dücax, choma rü ãxwa tümacèx chacagüecha. Rũ ngëxguma chi texé choxũ ñügu rü chauxcèx tayawãxnagu, rü tá tümaxũtagu chaxücu. Rũ tümamaã tá chachibü rü tüma i chomaã. ²¹ Rũ yíxema nüxũ rüporamaëgüxe i chixexũ, rü tá chaugüxütawa tüxũ charütogüxëë na chomaã ãëxgacü tixïgüxücèx, yexgumarüũ ga choma rü nüxũ na charüporamaëxũ ga chixexũ, rü ñüxüchi Chaunatüxütawa na chayarüttoxürüũ na namaã ãëxgacü chiïxücèx'. ²² Rũ yíxema ãchixexë rü name nixĩ i naga taxĩnü i ngēma Tupanaãë i Üünexũ nüxũ ixuxũ namaã i ngēma yaxôgüxütücümügü”, ñanagürü ga yema chomaã idexaxũ.

4

Tupanaxũ nataxëëgü i daxüguxũ i naãnewa

¹ Rũ yemawena ga choma ga Cuáũ rü nüxũ chadau ga wüxi ga ãx ga iwãxnaxũ ga daxüguxũ ga naãnewa. Rũ yema naga ga nacornetagaraũxũ ga noxri nüxũ chaxĩnüxũ ga chomaã idexaxũ, rü ñanagürü choxũ:

“¡Nuxã naxĩnagü! Rũ tá cuxũ nüxũ chadauxëë i ngēma yíxcüra tá ngupetüxũ”, ñanagürü.

² Rũ yexgumatama ga choma rü Tupanaãë i Üünexũ rü chauãëmaã inacuèx, rü daxüwa nanaga. Rũ yéma daxüguxũ ga naãnewa nüxũ chadau ga wüxi ga tochicaxũ ga mexëchixũ ga yéma Tupana nawa rüttoxũ. ³ Rũ guma yema tochicaxüwa rütocü, rü ñoma nuta ya mexëchicü ya yasperüũ nixĩ na namexũ rü ñoma nuta

ya cornalínarüŷ nixĩ na namexũ. Rũ yema tochicaxũetüwa nayexma ga wüxi ga chirapa ga ñoma nuta ga esmerádarüŷ mexẽchicü. ⁴ Rũ yema tochicaxũcũwawa nayexmagü ga 24 ga togü ga tochicaxũgü ga nüxũ ínumaẽguãchixũ. Rũ yema tochicaxũgüwa narütogü ga 24 ga ãẽxgacügü ga yaxõgüxũãrũ ixĩgüxũ. Rũ cómuxũmaã nixãxchiru rũ uirunaxcèx nixĩ ga norü ngèxcueruũgü. ⁵ Rũ yema nachica ga Tupana írütöxüwa ínaxüxũ ga bèjxbẽxanexũ rũ duruanexũ rũ nagagü. Rũ yema tochicaxũpẽxewa nayexma ga 7 ga omügü ga yéma naĩgüxũ. Rũ yema omügü nixĩ ga Tupanaãẽ i Üünexũ ga yema 7 ga yaxõgüxũtücümümaã icuáxũ. ⁶ Rũ yema Tupanaãrũ tochicaxũpẽxewa rũ ñoma dexáétüwarüŷ ixĩxũmaã nachaxu rũ nichipetü woruarüŷ. Rũ yema tochicaxũxũ ínachomaẽguãchi ga ãgümücü ga daxüçũãx ga maxẽxũ ga guxüwama ãxëtüxũ naweama rũ napẽxewa. ⁷ Rũ wüxi ga yema daxüçũãx ga maxẽxũ rũ nanaxairaxũ. Rũ yema to rũ nanawocaraxũ. Rũ yema norü tomaẽxpüx rũ nanaduũxüchiweraxũ. Rũ yema norü ãgümücü rũ nanaxĩyü i gonagüxũraxũ. ⁸ Rũ yema ãgümücü ga daxüçũãx ga maxẽxũ, rũ wüxichigü nüxũ nayexma ga 6 ga naxpẽxatügü. Rũ guxüwama ga naxpẽxatüetüwa rũ naxpẽxatütüüwa rũ namuxëtü. Rũ ngunecü rũ chütacü rũ ñanagürügüecha:

“Naxüüne, naxüüne, naxüüne nixĩ ya tórü Cori ya Tupana ya guxüetüwa ngèxmacü rũ woetama ngèxmaẽchacü”, ñanagürügüecha. ⁹⁻¹⁰ Rũ yema daxüçũãx ga maxẽxũ, rũ yexguma nüxũ yacuèüügüũxgu ga guma tochicaxüwa rütocü,

rü moxê nüxna naxãgügu, rü yema 24 ga ãëxgacügü ga yaxõgüxüãrü rü yima woetama ngêxmaêchacüpêxegu nacaxãpüxügü, rü nüxü nicuèxüüügü, rü napêxegu nananu ga norü ngèxcueruüügü. ¹¹ Rü ñanagürügü:

“Pa Torü Cori, Pa Torü Tupanax, cuxü nixĩ i namexü na tikuèxüüügüxü rü cuxü tataxêëgüxü, erü guxüëtüwa cungêxma. Yerü cuma cunaxü ga guxüma rü curü ngúchaügagu nixĩ i nangóxü i ñuxmax”, ñanagürügü.

5

Popera ga idixixüchiga rü Tupana Nane ga ñoma wüxi ga carnerurüü imäcüchiga

¹ Rü ñuxüchi nüxü chadau ga guma tochicaxüwa rütocü, rü norü tügünemêxêwa nanange ga wüxi ga popera ga idixixü. Rü düxétüwa rü aixepewa rü naxãmatü ga yema popera. Rü 7 wa niñaxtachipêxe. ² Rü nüxü chadau ga wüxi ga norü orearü ngeruü ga daxücüãx ga poraxüchixü ga tagaãcü ícaxü rü ñaxü:

“¿Texé tixĩ ya yíxema mexe na tayagautanüxü i norü ñaxtachipêxexü rü ítayadixgüxü i ñaã popera?” ñaxü. ³ Natürü woo ga daxügüxü ga naãnewa rü bai ga ñoma ga naãnewa rü bai ga yuexütanüwa, rü tataxuma ga texé ga mexe na ítayadixgüxü rü nüxü tadaumatüxü na ñuxü ñaxü ga yema popera. ⁴ Rü choma rü poraãcü chaxaxu yerü tataxuma ga texé ga mexê na ítayadixgüxü rü nüxü tadaumatüxü na ñuxü ñaxü ga yema popera. ⁵ Natürü wüxi ga yema 24 ga ãëxgacügü ga yaxõgüxüãrü, rü ñanagürü choxü:

“¡Tãxũ i cuxaxuxũ! Erũ yima Cristu ya Yudátaa ya airũxũ poracũ ya ãẽxgacũ ya Dabítaa ixĩcũ, rũ marũ nüxũ narũyexera i guxũma i chixexũ. Rũ ngẽmacẽx nüma nixĩ i namexũ na yagautanũãxũcẽx i ngẽma 7 i norũ ñaxtachipẽxexũ i ngẽma popera rũ na íyawẽgũãxũcẽx”. ⁶ Rũ ñuxũchi nüxũ chadau ga Tupana Nane ga ñoma wũxi ga carneruxacũ ga mẽxwa írũdaxũrũũ yexma chicũ naxũtagu ga guma tochicaxũwa rũtocũ rũ natanũgu ga yema ãgũmũcũ ga daxũcũãx ga maxẽxũ rũ yema 24 ga ãẽxgacũgũ. Rũ nüxũ nayexma ga 7 ga nachatacuxre ga norũ poraarũ cuẽxruũ rũ 7 ga naxẽtũ. Rũ guma 7 ga naxẽtũ rũ ngẽma nixĩ i Tupanaãẽ i Üünexũ i guxũma i ñoma i naãnewa namuxũãrũ cuẽxruũ ixĩxũ. ⁷ Rũ guma pecaduarũ ütãnũcẽx yucũ rũ guma tochicaxũwa rũtocũcẽx nixũ, rũ nanayaxu ga yema popera ga norũ tũgũnemẽxẽwa yexmaxũ. ⁸ Rũ yexguma nayauxãgu ga yema popera, rũ yema ãgũmũcũ ga daxũcũãx ga maxẽxũ rũ yema 24 ga ãẽxgacũgũ rũ inacaxgũãpũxũ napẽxegu ga guma pecaduarũ ütãnũcẽx yucũ. Rũ wũxichigũ ga yema ãẽxgacũgũ rũ nüxũ nayexma ga wũxi ga norũ paxetarũ ga arpa. Rũ yexgumarũũ ta nüxũ nayexma ga copa ga uirunaxcẽx ga pumaratẽxemaã napagũxũ. Rũ yema pumaratẽxe rũ nayixichi ga yexguma yaxaxgu. Rũ yema pumaragũ, rũ ngẽma nixĩ i Tupanaãrũ duũxũgũarũ yumũxẽgũarũ cuẽxruũgũ. ⁹ Rũ nagu nawiyaegũ ga wũxi ga wiyae ga yexwacaxũxũ ga ñaxũ:

“Cuma nixĩ i cumexũ na cunayaxuxũ i ngẽma popera rũ cuyagautanũxũ i ngẽma norũ

ñaxtachipēxexũ. Yerü cuma rü marü quimèxchirēx, rü cugümaã Tupanaãxũ naxcèx cutaxe i nagúxũraũxũ i duũxũgü i nagúxũraũxũ i nachiuãnecũãx i nagúxũraũxũ i nagawa idexagũxũ. ¹⁰ Rü ngēmagũxũ cuxüchica i ngextá ãēxgacü íquiũxũwa, rü Tupanaãrũ ngũxēẽruũgũxũ cuyaxĩgũxēẽ na cumaã wũxigu guxũ i naãnemaã inacuèxgũxũcèx”,

ñanagürügü. ¹¹ Rü yemawena ichadawenü, rü nüxũ chaxĩnü ga naga ga muxũchixũma ga Tupanaãrũ orearü ngeruũgü ga daxũcũãx. Rü norü ngãxũwa nayexma ga yema tochicaxũ rü yema ägümücü ga daxũcũãx ga maxēxũ rü yema 24 ga ãēxgacügü. Rü namuxũchima ga yema Tupanaãrũ orearü ngeruũgü ga daxũcũãx ga yema yexmagũxũ. ¹² Rü tagaãcü ñanagürügü:

“Daa nixĩ ya yima ñoma wũxi i carneruacürüũ imácü ga pecaduarü ũtanücèx yucü. Rü nüma nixĩ i namexũ na guxũãrũ ãēxgacü yĩxũ, rü guxũãrũ yora yĩxũ, rü guxũ i cuèx nüxũ ngēxmaxũ, rü guxũãrũ yexera naporaxũ. Rü nüma nixĩ i namexũ na guxãma nüxũ ngechaũgũxũ rü nataxēẽgũxũ rü nüxũ icuèxüũgũxũ”, ñanagürügü. ¹³ Rü nüxũ chaxĩnü ta ga naga ga guxũma ga yema Tupanaũxũ i daxũgũxũ i naãnewa rü ñoma i naãnewa rü naãnetüũwa rü taxtũ i taxũwa ngēxmagũxũ ga ñagũxũ:

“Name nixĩ na guxũgutáma guxãma nüxũ icuèxüũgũxũ rü nüxũ ngechaũgũxũ rü nataxēẽgũxũ ya yima pecaduarü ũtanücèx yucü rü yima ngēma tochicaxũwa rütocü, erü nümagü nixĩ i guxũguma ãēxgacügü yixĩgũxũ”, ñanagürügü.

14 Rû yema âgûmücû ga daxûcûâx ga maxêxû rû ñanagûrûgû:

“Ngêmaâcû yî”, ñanagûrûgû. Rû yema 24 ga âêxgacûgû rû inacaxgûâpûxû rû nûxû nicuèxûgû.

6

Yema 7 ga ñaxtachipêxe-ruûchiga

1 Rû ñuxûchi nûxû chadau ga yexguma guma pecaduarû ütanücèx yucû yagauyegu ga yema nûxîraûxû ga norû ñaxtachipêxexû ga yema popera. Rû nûxû chaxînü ga wûxi ga yema daxûcûâx ga maxûxû ga tagaâcû ñoma duruanexûrûü ñaxû choxû:

“¡Nuâ naxû!” ñaxû. 2 Rû ichadawenû rû nûxû chadau ga wûxi ga cowaru ga cômûxû. Rû yema naetüwa rüttoxû rû nûxû nayexma ga wûxi ga norû wûra. Rû wûxi ga ngèxcuerû nûxna naxâ. Rû poraêêcûma norû cowarumaâ inaxûâchi na duûxûgûxû nayexeraxücèx. 3 Rû yexguma guma pecaduarû ütanücèx yucû yagauyegu ga yema norû taxre ga yema poperaarû ñaxtachipêxexû, rû nûxû chaxînü ga yema norû taxre ga yema daxûcûâx ga maxûxû ga ñaxû choxû:

“¡Nuâ naxû!” ñaxû. 4 Rû yema naxû ga wûxi ga cowaru ga dauxû. Rû yema naetüwa rüttoxû rû wûxi ga tara ga taxû nûxna naxâ. Rû yexgumarû ta pora nayaxu na iyanaxoxêêxücèx na nûgû nangechaûgûxû ga duûxûgû. Rû yemaâcû nanaxû na nûgû nadêixücèx ga duûxûgû. 5 Rû yexguma guma pecaduarû ütanücèx yucû yagauyegu ga yema norû tomaêxpûx ga yema poperaarû ñaxtachipêxexû, rû nûxû chaxînü ga yema

norü tomaēxpüx ga yema daxüçüāx ga maxüxü ga ñaxü choxü:

“¡Nuã naxü!” ñaxü. Rü ichadawenü rü nüxü chadau ga wüxi ga cowaru ga waxüxü. Rü yema naetüwa rütoxü rü naxmēxwa nüxü nayexma ga wüxi ga tacüarü yaruü ga balanza. ⁶ Rü nüxü chaxĩnü ga wüxi ga naga ga yema daxüçüāx ga maxēxüārü ngāxütanüwa inaxüxü ga ñaxü:

“Wüxi i ngunexüārü puracütanü rü naxātanü i wüxi i kilo i trigu. Rü wüxi i ngunexüārü puracütanü naxātanü i tomaēxpüx i kilo i chebada. ¡Natürü tãxü i cuyanatauxēēxü i ngēma chixü rü yima binu!” ñanagürü. ⁷ Rü yexguma guma pecaduarü ütanüçèx yucü yagauyegu ga yema norü ägümücü ga yema poperaarü ñaxtachipēxexü, rü nüxü chaxĩnü ga yema norü ägümücü ga yema daxüçüāx ga maxēxü ga ñaxü choxü:

“¡Nuã naxü!” ñaxü. ⁸ Rü ichadawenü rü nüxü chadau ga wüxi ga cowaru ga dexexü. Rü yema naetüwa rütoxü rü Yu nixĩ ga naega. Rü yema naweama ne üxü, rü Yuexüchica nixĩ ga naega. Rü yema taxre nanayauxgü ga pora na ñoma ga nañnewa rü wüxi ga yema norü ägümücütücumü ga duüxügümaã inacuèxgüxüçèx na daimaã rü taiyamaã rü ñaaweanemaã rü ngoxo idüraexümaã nayuexēēxüçèx. ⁹ Rü yexguma guma pecaduarü ütanüçèx yucü yagauyegu ga yema norü wüximēxpüx ga yema poperaarü ñaxtachipēxexü, rü nüxü chadau ga wüxi ga nachica ga ngextá Tupanacèx naxüñagü nawa yagugüxü na nüxna naxägüāxüçèx. Rü yema nachicatüüwa nüxü chadau ga naãégü ga yema duüxügü ga Tupanaärü orexü na yaxugüxüçèx nadèixü. ¹⁰ Rü

yema naãëgü rü tagaãcü ñanagürügü:

“Pa Torü Cori ya Guxüetüwa Ngëxmacü rü Üüncü rü Ixaixcümacüx, ¿ñuxgura tá ta i nüxna cucaxü rü cunapoxcuexü i ngëma duüxügü i chixexü ga toxü dëixü?” ñanagürügü. ¹¹ Rü ñuxüchi ga Tupana rü wüxichigü ga yema duüxügüna nanaxã ga naxchiru ga máxü rü cómuxü. Rü yema duüxügüãëgüxü ñanagürü:

“¡Paxaãchi iperüngüë ñuxmatáta yangu i peeneëgü i Cristuaxü puracüexü i pexrüü tá dëixü!” ñanagürü. ¹² Rü yexguma guma pecaduarü ütanüçex yücü yagauyegu ga yema norü 6 ga yema poperaarü ñaxtachipëxexü, rü nüxü chadau ga poraãcü na naxiãxãchianexü. Rü üëxcü rü wüxi ga naxchiru ga waxcharaxürüü nixi. Rü tauemacü rü guxüwama nagürüü naduema. ¹³ Rü woramacurigü rü êtagü rü daxüwa narüyi rü ñoma ga naãnegu nayi. Rü ñoma orix i doxüxüma buanecü ya tacü rüyixëëxürüü nixi. ¹⁴ Rü guxüma i daxüwa nüxü idauxü rü inayarütaxu. Rü ñoma wüxi i popera i dixcumüächixü rü iiyarütaxuxürüü nixi. Rü guxüma ga mëxpünegü rü capaxügü rü nixigachi ga nachicawa. ¹⁵ Rü ñoma ga naãnewa yexmagüxü ga nachiüãnegüarü ãëxgacügü, rü mëxpünemagu rü mëxpüneärü nutatanügu nicuxgü. Rü wüxigu yexma namaã nicuxgü ga yema togü ga ãëxgacügü ga taxügü ga ñoma ga naãnemaã icuëxgüxü, rü churaragüarü ãëxgacügü ga taxügü, rü yema duüxügü ga muärü dïëruãxgüxü, rü yema duüxügü ga ñoma ga naãnewa poraexü, rü guxüma ga duüxügü ga coriãxgüxü, rü guxüma ga

duŭxŭgŭ ga ngearŭ coriãxgŭxŭ. ¹⁶ Rŭ guxŭma ga nŭmagŭ, rŭ guma mèxpŭnexŭ rŭ guma nutagŭxŭ ñanagŭrŭgŭ:

“¡Toétŭgu peyi na toxŭ ipicuxgŭxŭcèx naxchaxwa ya yima ngẽma tochicaxŭwa rŭtocŭ, rŭ naxchaxwa ya yima pecaduarŭ ũtanŭcèx yucŭ erŭ tama tanaxwèxe na toxŭ napoxcuexŭ! ¹⁷ Erŭ marŭ ínangu i ngẽma ngunexŭ i ãŭcŭmaxŭ i nagu napoxcuexŭ i ngẽma duŭxŭgŭ i tama Tupanaârŭ ixŭgŭxŭ. ¿Rŭ texé tá namaã tabora i ngẽma?” ñanagŭrŭgŭ.

7

Yema Yudŭgŭ ga nacatŭwa cuèxruŭãxgŭxŭchiga

¹ Rŭ yemawena rŭ nŭxŭ chadau ga ãgŭmŭcŭ ga Tupanaârŭ orearŭ ngeruŭgŭ ga daxŭcŭãx ga ñoma ga naãneârŭ ãgŭmŭcŭpèxegu chigŭxŭ. Rŭ ínanafoxŭgŭ ga gucŭma ga buanecŭgŭ na tama waixŭmŭãneetŭgu naxŭxŭcèx, rŭ tama taxŭ i taxtŭtŭtŭgu naxŭxŭcèx, rŭ bai i tacŭ rŭ naŭtŭtŭgu naxŭxŭcèx. ² Rŭ yexgumarŭŭ ta nŭxŭ chadau ga wŭxi ga Tupanaârŭ orearŭ ngeruŭ ga daxŭcŭãx ga ũèxcŭ íyarŭgoxŭwaama ne ũxŭ. Rŭ nŭxŭ nayexma ga Tupana ya Maxŭcŭarŭ tacŭarŭ ũegarŭŭ. Rŭ nŭma rŭ tagaãcŭ nŭxna nacagŭ ga yema togŭ ga ãgŭmŭcŭ ga Tupanaârŭ orearŭ ngeruŭgŭ ga nayauxgŭxŭ ga pora na nachixexèègŭãxŭcèx ga guxŭma ga waixŭmŭ rŭ guxŭma ga taxŭ ga taxtŭ. ³ Rŭ ñanagŭrŭ nŭxŭ:

“¡Tãxŭ i yatacŭma penachixexèèxŭ i waixŭmŭ rŭ taxtŭ i taxŭ rŭ naŭgŭ, ñuxmatáta nacatŭwa tayaxŭarŭ cuèxruŭãxgŭ i ngẽma Tupanaârŭ

duũxügü ixĩgüxũ!” ñanagürü. ⁴ Rũ nüxũ chaxĩnü ga ñuxre na yĩxũ ga yema cuèxruũãxgüxũ. Rũ guxũma ga Yudíugütanüwa rü 144,000 nixĩ. ⁵⁻⁸ Rũ yema cuèxruũãxgüxũ ga Yudíugü, rü ñaã nixĩ:

Yudátaagü - 12,000

Rubéũtaagü - 12,000

Gadutaagü - 12,000

Achetaagü - 12,000

Netarítaagü - 12,000

Manachétaagü - 12,000

Chimeũtaagü - 12,000

Lebítaagü - 12,000

Ichacátaagü - 12,000

Chaburãũtaagü - 12,000

Yúchetaagü - 12,000

Beyamítaagü - 12,000

⁹ Rũ yemawena ichadawenü, rü nüxũ chadau ga muxũchixũma ga nagúxũraũxũ ga duũxügü ga nagúxũraũxũ ga nagawa idexagüxũ ga guxũma ga nachiuãnewa ne ixũ. Rũ yema tochicaxũpẽxegu rü guma pecaduarü ütanüçèx yucüpẽxegu nachigü. Rũ yema na namuxũchixũ rü taxucürüwa texé tayaxugü na ñuxre yĩxũ. Rũ naxchiru ga icómüxũ rü imáxũmaã nixãxchiru. Rũ naxmẽxwa nanangegü ga wairaátügü. ¹⁰ Rũ guxũma ga nümagü rü tagaãcü ñanagürügü:

“Yima tórü Tupana ya tochicaxũwa rütocü rü yima pecaduarü ütanüçèx yucü nixĩ ya tüxũ maxẽxẽgücü”, ñanagürügü. ¹¹ Rũ guxũma ga Tupanaãrü orearü ngeruügü ga daxũcüãx rü nüxũ ínachimaẽguãchi ga yema tochicaxũ rü yema 24 ga ãẽxgacügü rü yema ágümücü ga daxũcüãx ga maxẽxũ. Rũ yema tochicaxũpẽxegu

nanangücuchitanü ga yema orearü ngeruügü, rü Tupanaxü nicuèxüügü. ¹² Rü ñanagürügü:

“Rü ngēmaācü yīī. Rü nūma nixī i namexü na guxüguma guxāma nüxü icuèxüügüxü, rü nataxēēgüxü, rü moxē nüxna ixāgüxü, rü nüxü ingechaügüxü, erü guxü i cuèx nüxü nangēxma, rü guxüetüwa nangēxma, rü guxüārü yexera napora. Rü ngēmaācü yīī”, ñanagürügü. ¹³ Rü ñuxüchi wüxi ga yema 24 ga āēxgacügü rü choxna naca, rü ñanagürü:

“¿Texégü tixīgü ya yixema cómüchirugüxe, rü ngextá ne taxī?” ñanagürü. ¹⁴ Rü choma chanangāxü, rü ñacharügü:

“Pa Corix, cuma nixī i nüxü cucuáxü na texégü tixīgüxü”, ñacharügü. Rü yexguma ga nūma rü ñanagürü:

“Yixemagü tixīgü ga nawa ngupetütanüxē ga yema ngúxü ga taxü rü marü tügü iyauxgüchiruxe nagüwa ga guma pecaduarü ütanücèx yucü. Rü ngēmacèx nixī i ticómüchiruxü. ¹⁵ Rü ngēmacèx nixī i Tupanaärü tochicaxüpēxewa tangēxmagüechaxü rü ngunecü rü chütacü rü Tupana íngēxmaxüwa nüxü tapuracüexü. Rü nūmatama ya Tupana ya tochicaxüwa rütocü rü tüxna nadau. ¹⁶ Rü marü tagutáma wenaxârü taiya tüxü nangux, rü tagutáma tiṭawae. Rü marü tagutáma üèxcü tüxü nigu, rü tagutáma üèxcüarü nañanexü tüxü nangux. ¹⁷ Erü yima pecaduarü ütanücèx yucü i ngēma tochicaxüxütawa ngēxmacü, rü tá aixcūma meā tüxna nadau ñoma carnerugüna idauxürüü. Rü nawa tá tüxü nagagü i ngēma dexáarü chuxchuxügü i maxēēruü. Rü Tupana tá tüxü ínanapi i guxüma i tümagüüxētü”, ñanagürü.

8

Yema norü 7 ga ñaxtachipëxeruüchiga rü yema buetare ga uirunaxcèxchiga

¹ Rü yexguma guma pecaduarü ütanücèx yucü yagauyegu ga yema norü 7 ga yema poperaarü ñaxtachipëxexü, rü ngãxü ga ora nachipetüanemare ga daxüguxü ga naãnewa. ² Rü ñuxüchi nüxü chadau ga yema 7 ga Tupanaärü orearü ngeruügü ga daxücüãx ga yexma Tupanapëxegu chigüxü. Rü wüxichigü nanayaxu ga norü corneta ga nüxna naxãxüne. ³ Rü yemawena ínangu ga wüxi ga to ga Tupanaärü orearü ngeruü ga daxücüãx. Rü yéma nanange ga wüxi ga norü buetare ga uirunaxcèx ga pumaraarü gutëxeruü. Rü yema uirunaxcèx ga pumaraarü gutëxeruütaxmüpëxegu nachi. Rü nanayauxtëxe ga taxü ga pumara ga nüxna naxãxü na yema tochicaxüpëxewa yexmaxü ga pumaraarü gutëxeruütaxmüwa yaguãxücèx, na yemaãcü Tupanana naxããxücèx ga yema pumaratëxe na yema pumaraema rü wüxigu Tupanaärü duüxügüarü yumüxëmaã Tupanaxütawa nanguxücèx. ⁴ Rü yema pumaratëxe ga yema orearü ngeruüãxü yexmaxü rü daxü naxüëma wüxigu namaã ga Tupanaärü duüxügüarü yumüxëgü ñuxmata Tupanaxütawa nangu. ⁵ Rü ñuxüchi ga yema orearü ngeruü rü nanayaxu ga yema buetare ga pumaraarü gutëxeruü. Rü yema pumaraarü gutëxeruütaxmüwa nanayaxu ga ãwe ga naïcü, rü gumamaã nanaxüãcu ga guma buetare. Rü ñuxüchi ñoma ga naãneetügu nanaña. Rü yexgumatama poraãcü naduruãchiane,

rü poraãcü nicuxcuane rü nibèixbêxane rü naxĩãxãchiane.

Tupanaãrũ orearũ ngeruũgũ ga daxũcũãxãrũ cornetachiga

⁶ Rü yexguma ga yema ⁷ ga Tupanaãrũ orearũ ngeruũgũ ga daxũcũãxã ga icornetaãxũ, rü nügũ ínamexêégũ na nagu yacuegũxũcèx. ⁷ Rü wüxi ga yema Tupanaãrũ orearũ ngeruũ rü nüxĩra nayacue ga norũ corneta. Rü yexgumatama ñoma ga naãneetũgu narüyi ga gáuxũ rü üxüema ga nagümaã ãëũxũ. Rü wüxi ga yema norũ tomaẽxpũxarũ üye ga ñoma ga naãne rü nixa. Rü yexgumarũũ ta wüxi ga yema norũ tomaẽxpũxarũ üye ga naĩxnecü rü nixa. Rü guxũma ga natüane rü nixae. ⁸ Rü yema norũ taxre ga Tupanaãrũ orearũ ngeruũ rü nayacue ga norũ corneta. Rü ñuxũchi wüxi ga tacü ga taxüchixũ ga namèxpũneraũxũ ga iyauxraxũ, rü yexma taxtũ ga taxũgu nanaña. Rü wüxi ga yema norũ tomaẽxpũxarũ üye ga taxtũ rü nagüxũ nananguxuchi. ⁹ Rü wüxi ga yema norũ tomaẽxpũxarũ üyetücumü ga yema taxtüwa maxẽxũ, rü nayue. Rü yexgumarũũ ta wüxi ga yema norũ tomaẽxpũxarũ üyetücumü ga wapurugũ, rü inayi. ¹⁰ Rü yema norũ tomaẽxpũxã ga Tupanaãrũ orearũ ngeruũ, rü nayacue ga norũ corneta. Rü ñuxũchi wüxi ga taxüchicü ga woramacuri ga taemaxũchicü rü daxũwa narũngu. Rü wüxi ga omü ga ixaxũrũũ nixĩ. Rü nagu nangu ga wüxi ga yema norũ tomaẽxpũxarũ üye ga natügũ rü natüxacügũ. ¹¹ Rü guma woramacuri rü Üxũxũ nixĩ ga

naega. Rū wūxi ga yema norū tomaēxpūxarū ūye ga guxūma ga dexá rū naxūxchiū. Rū muxūma ga duūxūgū rū yema dexáwa nayue yerū naxūxchiū. ¹² Rū yema norū āgūmūcū ga Tupanaārū orearū ngeruū rū nayacue ga norū corneta. Rū wūxi ga yema norū tomaēxpūxarū ūye ga uèxcū rū nixo. Rū yexgumarūū ta wūxi ga yema norū tomaēxpūxarū ūye ga tauemacū rū woramacurigū rū ēxtagū rū nixo. Rū yemaācū wūxi ga yema norū tomaēxpūxarū ūye ga guxūma ga yema rū naxēāne. Rū ga ngunecū rū āgūmūcū ga ora naxēāne. Rū ga chūtacū rū āgūmūcū ga ora nataxuma ga tauemacū rū bai ga woramacurigū rū bai ga ēxtagū. ¹³ Rū yemawena ichadawenū rū nūxū chaxīnū ga wūxi ga īyū ga daxūgu íxexeūxū ga tagaācū ñaxū:

“Nangechaūtūmūūgū i ngēma duūxūgū i yea pecaduāxū i naānewa maxēxū i ngēxguma yacuegūāgu tá ya norū cornetagū i ngēma togū i tomaēxpūx i Tupanaārū orearū ngeruūgū”, ñaxū.

9

¹ Rū yema norū wūximēēxpūx ga Tupanaārū orearū ngeruū, rū nayacue ga norū corneta. Rū nūxū chadau ga wūxi ga woramacuri ga daxūwa rūngucū ga ñoma ga naānegu ngucū. Rū guma woramacuri nanayaxu ga yema āxmaxū ga taguma iyacuáxūārū chawi. ² Rū nayawāxna ga yema āxmaxū ga taguma iyacuáxū. Rū yéma inayagoema ga caxixū ñoma wūxi i taxū i uxearū caxixūrūū. Rū yema caxixū rū nanaxēēmaxēē ga uèxcū. ³ Rū yema caxixūwa ínachoxū ga munūgū ga naāneētūgu yixū. Rū

yema munügü rü nanayauxgü ga pora ga nüxna naxãxü na ñoma tuxchinawerüü duüxügüxü nachixüçèx. ⁴ Rü yema munümaã nüxü nixu na tama natüanexü nachixexêëxüçèx rü bai i tacü rü nanetügü rü bai i tacü rü naigü. Natürü nanamu na nachixexêëgüãxüçèx ga yema duüxügü ga tama Tupanaärü cuèxruü nacatüwa yexmaxü. ⁵ Natürü tama nanamu na yema duüxügüxü nadèixüçèx. Natürü nanamu na ngüxü nüxü yangexêëmaregüxüçèx ga wüximêëxpüx ga tauemacü. Rü yema ngüxü ga nüxü yangexêëgüxü, rü ñoma tuxchinawe duüxügüxü chixürüü nixĩ. ⁶ Rü ngẽma ngunexügügu rü duüxügü tá naxcèx nadaugü na nayuxü, natürü tãütáma nayue. Rü woo nanaxwèxegüxüchi na nayuxü, natürü taxucürüwatáma nayue. ⁷ Rü yema munügü rü ñoma cowaru i guerawa ixürüü nixĩgü. Rü naẽruwa nüxü nayexma ga tacü ga ñoma ngèxcuerüü ga uirunaxcèxrüü ixĩgüxü. Rü nachiwe rü nanaduüxüchiweraxügü. ⁸ Rü nayaegü rü ñoma ngeãxyaerüü nixĩgü. Rü napütagü rü ñoma aipütagürüü nixĩgü. ⁹ Rü naxünewa nayexma ga norü poxürüü ga fierunaxcèx. Rü naxpëxatügüga rü ñoma muxüchine ya caru ya guerawa cowaru tügünegarüü ixixü. ¹⁰ Rü nareexügü rü ñoma tuxchinawerüü naxãnegu. Rü yema naneguwa rü naxãguchata na wüximêëxpüx ya tauemacü duüxügüxü ngüxü yangexêëgüxüçèx. ¹¹ Rü yema munügüarü âëxgacü, rü yema äxmaxü ga taguma iyacuáxüârü dauruü nixĩ. Rü Yudíugügawa ga yema munügüarü âëxgacü, rü Abadóü nixĩ. Rü Griégugügawa rü Apolióü nixĩ. Rü ngẽma rü:

“Chixexêëruŭ”, ñaxŭchiga nixĩ. ¹² Rŭ yexma nayacuèx ga yema nüxĩraŭxŭ ga chixexŭ ga taxŭ, natürŭ ínayaxüama ga to ga taxre. ¹³ Rŭ yema norŭ 6 ga Tupanaârŭ orearŭ ngeruŭ rŭ nayacue ga norŭ corneta. Rŭ nüxŭ chaxĩnŭ ga wŭxi ga naga ga yema Tupanapêxewa yexmaxŭ ga uirunaxcèx ga pumaraarŭ gutêxeruŭtaxmüwa inaxŭxŭ. ¹⁴ Rŭ yema naga rŭ nanamu ga yema orearŭ ngeruŭ ga cornetaãxŭ, rŭ ñanagŭrŭ nüxŭ:

“¡Yawêgŭxŭ i ngêma ägŭmücŭ i orearŭ ngeruŭgŭ i Chatanáârŭ ixġgŭxŭ i taxtŭ i Eufrátegu ngãxŭgŭxŭ!” ñanagŭrŭ. ¹⁵ Rŭ yemaäcŭ niwêgŭxŭ ga yema ägŭmücŭ ga orearŭ ngeruŭgŭ na nadaiãxŭcèx ga wŭxi ga yema norŭ tomaêxpŭxarŭ üyetücümŭ ga duŭxŭgŭ. Yerŭ ga yema orearŭ ngeruŭgŭ rŭ woetama yemacèx ínmemaregŭ na yema ora rŭ yema ngunexŭ rŭ guma tauemacŭ rŭ guma taunecŭ nadaiãxŭcèx ga yema duŭxŭgŭ. ¹⁶ Rŭ nüxŭ chaxĩnŭ na ñuxre na yġxŭ ga yema orearŭ ngeruŭgŭarŭ churaragŭ ga cowaruétŭgu ĩxŭ. Rŭ 200 miyónegŭ nixġgŭ. ¹⁷ Rŭ yemaäcŭ nixĩ ga nüxŭ chadauxŭ ga yema cowarugŭ ga yexguma changoxetŭgu. Rŭ yema churaragŭ ga yema cowaruétŭgu ĩxŭ rŭ nüxŭ nayexma ga norŭ ngèxcuxŭnexŭ ga poxŭruŭ ixġxŭ ga ñoma üxüxetürŭ iyauraxŭ. Rŭ yema poxŭruŭ rŭ nixãmatŭ rŭ nidaumatŭ rŭ niyèuxmatŭ rŭ nidexmatŭ. Rŭ yema cowaruerugŭ rŭ ñoma aierurŭ nixġgŭ. Rŭ naãxgŭwa ínaxŭxŭ ga üxüema rŭ caxixŭ rŭ azufre. ¹⁸ Rŭ wŭxi ga norŭ tomaêxpŭxarŭ üyetücümŭ ga duŭxŭgŭ rŭ nayue namaã ga yema tomaêxpŭx ga chixexêëruŭ ga üxüema rŭ caxixŭ rŭ azufre

ga yema cowarugüèxwa íchoxüxü. ¹⁹ Yerü ga yema cowarugü rü naãxwa rü nareexüwa nixí ga nüxü nayexmaxü ga norü pora na duüxügüxü nadèixücèx. Yerü ga nareexügü rü ñoma äxtaperüü nixígü, rü yemamaã nanangõx ga duüxügü rü ngúxü nüxü ningexëë rü nanadai. ²⁰ Natürü ga yema togü ga duüxügü ga tama yema poxcuruügümaã yuexü, rü tama nüxü narüxoe ga yema chixexügü ga naxügüxü. Rü tama nüxü narüxoe na nüxü yacuèxüügüxü ga ngoxogü rü norü tupananetachicünèxägü ga uirunaxcèx rü dñerumünaxcèx rü cobrenaxcèx rü nutagünaxcèx rü nañnaxcèx. Rü yemaãcü nüxü nicuèxüügüama ga yema norü tupananetachicünèxägü ga ngearü maxüãxü rü tama nüxü dauxü rü tama nüxü ñnüxü rü tama ixüxü. ²¹ Rü tama nüxü narüxoe na namáétagüxü, rü yayuüexü, rü nangëãégüxü rü nangñtèèxgüxü.

10

Orearü ngeruü ga nüxü yexmaxü ga popera ga idixixüchiga

¹ Rü nüxü chadau ga wüxi ga to ga Tupanaãrü orearü ngeruü ga daxügüxü ga naãnewa íruxixü. Rü wüxi ga caixanexüãrü ngãxüwa nayexma, rü wüxi ga chirapa naétügu nabo. Rü nachiwe rü ñoma üèxcürüü niyauracüü. Rü naparagü rü ta ñoma üxüemarüü niyauracüü. ² Rü naxmëxwa nüxü nayexma ga wüxi ga poperaxacü ga íiwëgüxü. Rü norü tügünepara rü taxtü i taxñetügu nachicutü. Rü norü toxwepara rü waixümüãnegu nachicutü. ³ Rü ñüxüchi ga nüma rü tagaãcü aita naxü ñoma wüxi ya ai ya tagaãcü aita ücürüü.

Rü yexguma aita naxüxgu rü 7 êxpüxcüna naduruâchiane. ⁴ Rü yexguma yema 7 êxpüxcüna na naduruâchianexüguwena rü chanaxümatüchaü. Natürü nüxü chaxĩnü ga wüxi ga naga ga daxüguxü ga naãnewa inaxüxü ga ñaxü choxü:

“¡Tãxü i cunangoxêxü i ngẽma 7 i duruanexü nüxü ixuxü! ¡Rü ngexrüma na cunaxümatüxü!” ñaxü choxü. ⁵ Rü ñuxüchi ga yema Tupanaãrü orearü ngeruü ga nüxü chadauxü na taxtü ga taxüetügu rü waixümüetügu nachicutüxü, rü daxü naxunagü ga norü tügünechacü. ⁶ Rü inaxuneta naegagu ga Tupana ya yima guxüguma maxücü ya yima naxücü i daxüguxü i naãne rü ñoma i naãne rü taxtü i taxü rü guxüma i tacü nawa ngëxmagüxü. Rü ñanagürü ga yema orearü ngeruü:

“Ñuxma rü marü tãütama nuxcü ningu i ngẽma Tupana nüxü ixuxü. ⁷ Erü ngëxguma nawa nanguxgu na ngẽma norü 7 i Tupanaãrü orearü ngeruü inaxügüxü na yacueãxü ya norü corneta, rü ngëxguma tá nixĩ i yanguxü ga yema noxri êxüguxü ga Tupanaãrü uneta, yema nuxcümaügüxü ga norü orearü uruügümaã nüxü yaxuxü”, ñanagürü. ⁸ Rü yema naga ga noxri nüxü chaxĩnüxü ga daxüguxü ga naãnewa inaxüxü, rü wenaxãrü chomaã nidexa. Rü ñanagürü choxü:

“¡Naxütawa naxü i ngẽma Tupanaãrü orearü ngeruü i taxtü i taxüetügu rü waixümüãneetügu chicutüxü! ¡Rü nüxna nayaxu i ngẽma poperaxacü i marü íiwëgüxü i naxmëxwa ngëxmaxü!” ñanagürü. ⁹ Rü naxütawa chaxü ga yema orearü ngeruü, rü nüxna naxcèx chaca ga yema poperax-

acü na choxna naxããxücèx. Rû nûma rû ñanagürü choxü:

“Ñãã nixĩ. ¡Rû nayaxu rû nangõx! Rû cuèxwa rû berurerüü tá namaĩcura. Natürü cuanüwa rû tá nanaxüxãchi”, ñanagürü choxü. ¹⁰ Rû yema orearü ngeruümëxëwa chanayaxu ga yema poperaxacü, rû chanangõx. Rû chauèxwa rû berurerüü namaĩcura. Natürü yexguma chanangõxguwena rû chauanüwa rû nanaxüxãchi rû changuxneca. ¹¹ Rû ñuxüchi chomaã nüxü nixu, rû ñanagürü choxü:

“Name nixĩ na wenaxârü Tupanaârü orexü quixuxü namaã i muxüma i nagúxüraüxü i duüxügü, rû muxüma i nachiuñanecüãxgü i duüxügü, rû muxüma i duüxügü i to i nagawa idexagüxü, rû muxüma i nachiuñanegüarü ãëxgacügü”, ñanagürü choxü.

11

Taxre ga orearü uruüchiga

¹ Rû yemawena chanayaxu ga wüxi ga dexnemenèxã ga ngugürüü ixixüne ga choxna naxãxüne. Rû guma choxna naxãcü rû ñanagürü choxü:

“¡Inachi rû nangugü ya yima Tupanapata rû ngëma pumaraarü gutëxeruütaxmü! ¡Rû yaxugü rû ñuxre yüxü i ngëma duüxügü i ngëma Tupanaxü icuèxüügüxü! ² ¡Natürü ngëma naãxtü ya Tupanapata, rû tãütáma cunangugü! Erü ngëma duüxügü i tama Tupanaãxü yaxõgüxüna marü nanaxã. Rû nümagü rû tomaëxpüx ya taunecüarü ngãxü tá chixexü namaã naxügü ya yima ñãne ya üünene ya Yerucharéü. ³ Rû choma rû tá chanamu i taxre i chorü orearü uruügü na 1,260 i ngunexü

duũxũgũmaã nüxũ yaxugũxũcèx i chorü ore. Rü nümagü i ngẽma taxre rü tá niwẽxchiru na ngẽmawa duũxũgũ nüxũ cuèxgũxũcèx na ngechaũ nüxũ ngũxgũxũ”, ñanagürü choxũ. ⁴ Rü ngẽma taxre i orearü uruũgü nixĩ i norü cuèxruũ i ngẽma taxre i nanetü i orĩbu rü ngẽma taxre i weraarü uruũgü i tórü Cori ya ñoma i naãneärü yora ixĩcüpẽxewa ngẽxmagũxũ. ⁵ Rü ngẽxguma texé chixexũ namaã ügüchaũgu i ngẽma taxre i orearü uruũgü, rü nümagü rü üxüema ya naãxwa ínacuexechinemaã tüxũ tá ínagu. Rü ngẽmaãcü tá inayanaxoxẽe i norü uwanügü. Rü ngẽmaãcü tá tüxũ nadai ya yíxema chixexũ namaã ügüchaũxẽ. ⁶ Rü ngẽma taxre i orearü uruũgü rü nüxũ nangẽxma i pora na íyachaxãchixũcèx ya pucü na tama napuxũcèx i guxũma i ngẽma 1,260 i ngunexũgü i nagu Tupanaärü orexũ yaxugũxũ. Rü ngẽxgumarüũ ta nüxũ nangẽxma i pora na nagũxũ yaxĩxẽegũãxũcèx i dexá. Rü ngẽxgumarüũ ta nüxũ nangẽxma i pora na ñoma i naãnewa namugüãxũcèx i nagüxũraũxũ i poxcuruũgü na ngẽmaãcü ngüxũ duũxũgũxũ yangexẽegũxũcèx i ngẽxguma ngẽma taxre naxwèxegügu. ⁷ Natürü ngẽxguma ngẽma taxre i orearü uruũgü naguxẽegügu na nüxũ yaxugũxũ i Tupanaärü ore, rü ngẽma ngoxo i ngẽma ãxmaxũ i taguma iyacuáxũwa íxũxũxũ, rü tá ngema taxrena nayuxu. Rü tá nüxũ narüyexera, rü tá nanadai. ⁸ Rü ngẽma naxünegü i ngẽma taxre rü tá yima ñãne ga tórü Cori nawa curuchawa ipotane ya Yerucharéüärü ítamũgüwa nawogü. Rü yima ñãne rü nachixe rü ngẽmacèx Chodomaärü ñãnemaã rü Equituanemaã nanaxugü. ⁹ Rü tomaẽxpüx i

ngunexũârũ ngãxũ rü muxũma i nagũxũraũxũ
 i duũxũgũ rü muxũma i guxũ i nachiuãnecũãx
 i duũxũgũ rü muxũma i duũxũgũ i to i nagawa
 idexagũchigũxũ, rü tá nüxũ nadaugũ i naxũnegũ.
 Rü tâütáma nanaxwèxegũ na texé inatèxgũxũ.
¹⁰ Rü ngẽma duũxũgũ i ñoma i naãnewa maxẽxũ rü
 tá nataãægũ na marũ nayuexũ i ngẽma taxre.
 Rü ngẽma na poraãcü nataãægũxũchixũ rü tá
 nügũna ãmare naxãgũ, yerũ yema taxre ga orearũ
 uruũgũ rü poraãcü nanachixewe rü naãewa
 nananguxẽægũ. ¹¹ Natürũ yema tomaẽxpũx ga
 ngunexũârũ ngãxũguwena, rü Tupana wenaxãrũ
 nanamaxẽxẽ ga yema taxre. Rü wenaxãrũ
 ínarũdagũ. Rü guxũma ga yema duũxũgũ ga nüxũ
 daugũxũ rü poraãcüxũchi namuũẽ. ¹² Rü ñuxũchi
 ga yema taxre ga orearũ uruũgũ, rü nüxũ naxĩnũẽ
 ga wũxi ga naga ga tagaãcü daxũguxũ ga naãnewa
 inaxũxũ ga ñaxũ:

“¡Nuã daxũwa pexĩ!” ñaxũ. Rü yemaãcü
 ga nümagũ rü wũxi ga caixanexũgu daxũguxũ
 ga naãnewa naxĩ. Rü norũ uwanũgũ rü yema
 nüxũ narũdaunũ. ¹³ Rü yexgumatama poraãcü
 naxĩãxãchiane. Rü wũxi ga yema norũ 10 arũ üye
 ga guma ããne, rü niwèxgũ. Rü 7,000 ga duũxũgũ
 nayue namaã ga yema ããchiane. Rü yema togũ
 ga duũxũgũ ga maxẽxũ rü poraãcüxũchi namuũẽ.
 Rü Tupana ya daxũguxũ i naãnewa ngẽxmacũxũ
 nicuèxũgũ. ¹⁴ Rü yexma nayacuèx ga yema norũ
 taxre ga chixexũ. Natürũ paxa tá ínangu i ngẽma
 norũ tomaẽxpũx ixĩxũ.

Guma norũ 7 ga cornetachiga

15 Rū yema norü 7 ga Tupanaãrū orearü ngeruü, rü nayacue ga norü corneta. Rū nayexma ga nagagü ga tagaãcü daxüguxü ga naãnewa inaxügüxü ga ñagüxü:

“Ñuxma rü yima mecü na namaã inacuèxgüxü i ñoma i naãne, rü nüma nixĩ ya tórü Cori ya Tupana rü Nane ya Cristu. Rü nüma rü guxügutáma namaã inacuèxgü”, ñagüxü. 16 Rü nümagü ga yema 24 ga ãëxgacügü ga norü tochicaxügüwa rütogüxü ga Tupanapëxewa, rü yexma nanangücuchitanü, rü Tupanaxü nicuèxüügü. 17 Rü ñanagürügü:

“Pa Torü Cori ya Tupana ya Guxüãrū Yexera Poracüx, cuma rü woetama cuyexmaëcha, rü ñuxma rü ta cungëxmaëcha. Rü moxë cuxna taxägü, erü marü cugümëxëwa cunangëxmaxëë i guxüma, rü marü icunaxügü na namaã icucuáxü. 18 Rü ngëma duüxügü i tama cuxrü ixīgüxü rü poraãcüxüchi nanuë, natürü nawa nangu i ngëma ngunexü i nagu tá cunapoxcuexü. Rü ngëxgumarüü ta marü nawa nangu na nüxü quicagüxü i guxüma i duüxügü i yuexü. Rü marü nawa nangu na nüxü cunaxütanüxü i ngëma curü duüxügü i curü orearü uruügü, rü ngëma duüxügü i cupëxewa imexü, rü guxüma i ngëma duüxügü i cuxü muüëxü i yaexü rü buexü. Rü marü nawa nangu na icuyanaxoxëëxü i ngëma duüxügü i nachix-exëëxü i ñoma i naãne”, ñanagürügü. 19 Rü ñuxüchi Tupanapata ga daxügüxü ga naãnewa yexmane, rü niwãxna. Rü yéma norü aixepewa nüxü chadau ga yema baú ga Tupanaãrū uneta ga nutagu ümatüxü. Rü nibèixbëxane, rü poraãcü nicux-cuane, rü naxĩãxãchiane rü poraãcü gáuxü narüyi.

12

Wüxi ga nge rü wüxi ga coya ga taxü

¹ Rü ñuxüchi daxüwa nangox ga wüxi ga cuèxruü ga taxü. Rü iyexma ga wüxi ga nge ga üèxcürüü iyaurachirucüücü. Rü ngütüücutüwa nayexma ga tauemacü. Rü yema ngîrü ngèxcuerüü ga ngîëruwa yexmaxü, rü 12 ga woramacurigü nixîgü. ² Rü yema nge rü itacharaü. Rü poraäcü aita ixü yerü ixíraxacüchaü rü poraäcü inguxnecaxüchi. ³ Rü yemawena daxüwa nangox ga to ga cuèxruü. Rü yéma nayexma ga wüxi ga coya ga taxüchixü ga dauxü ga 7 ga naëru nüxü yexmaxü rü 10 ga naxchatacuxre. Rü wüxichigü ga naëruwa rü nüxü nayexma ga norü ngèxcuerüü. ⁴ Rü nareexümaã inayatúchigü ga wüxitücumü ga norü tomaëxpüxarü üye ga woramacurigü, rü ñoma ga naãneëtügu nanawogü. Rü yema coya rü ngîpëxegu nayachi ga yema nge ga íraxacüchaücü, yerü tüxü nangõxchaü ga guxema ngîxäcüxe ga yexguma tabuxgu. ⁵ Rü yema nge rü ixíraxacü, rü nayatü. Rü nüma rü tá guxü i nachiüãneärü äëxgacü nixî, rü tá namaã inacuèx. Natürü ga guma ngîne rü Tupana ngixna nanayaxu rü yema ínatoxüwa nanaga. ⁶ Rü yema nge rü wüxi ga nachica ga ngextá taxüema íxãpataxüwa iña. Rü yéma Tupana ngîxcèx nanamexëë ga wüxi ga ngîchica na yéma ngîxna nadauxüçèx rü ngîxü naxüwemüxüçèx ga 1,260 ga ngunexü. ⁷ Rü yemawena ga daxüwa rü nügü nadai. Rü Miguere ga Tupanaärü orearü ngeruügüarü äëxgacü ixîcü rü guxüma ga natanüxü ga orearü ngeruügü, rü nügü nadai namaã ga yema coya ga taxüchixü

rü norü orearü ngeruüğü. Rü yema coya rü ñuxüchi norü orearü ngeruüğü i chixexü rü poraãcü Tupanaârü orearü ngeruüğümaã nüğü nadai. ⁸ Natürü ga yema coya rü norü orearü ngeruüğü rü tama Tupanaârü orearü ngeruüğüxü narüporamaëğü. Rü ñuxüchi ga yema coya rü norü orearü ngeruüğü rü nangechica ga daxügxü ga naãnewa. ⁹ Rü yemaãcü ínatëxüchi ga daxügxü ga naãnewa ga yema coya ga yema nuxcümaüxü ga äxtape. Rü nüma rü ngoxogu rü Chatanágu naxãega. Rü nüma nixi i guxüma i ñoma i naãnecüäx i duüxügxü nawomüxëxü. Rü nüma rü norü orearü ngeruüğümaã ñoma ga naãnegu narüwoü. ¹⁰ Rü ñuxüchi nüxü chaxínü ga wüxi ga naga ga daxügxü ga naãnewa tagaãcü ñaxü:

“Ñuxma rü marü nawa nangu na tórü Tupana rü norü duüxügxü namaxëxëxü. Rü ñuxma rü nüma tüxü nüxü nadauxëe na guxüârü yexera naporaxü rü guxüârü äëxgacü yixü. Rü Nane ya Cristu rü marü tüxü nüxü nadauxëe na guxümaã inacuáxü. Yerü marü daxügxü ga naãnewa ínatëxüchi ga Chataná ga ngunecü rü chütacü tórü Tupanapëxewa taeneëgxü yeüürü ixuechaxü. ¹¹ Rü nümagü ga yema taeneëğü, rü marü Chatanáxü narüyexeragü nagügagu ga guma pecaduarü ütanücëx yucü rü nagagu ga Tupanaârü ore ga nüxü yaxugüxü. Yerü ga nümagü rü tama nayanuxüğü ga norü maxü, rü ínamemaregü na Tupanacëx nayuexü. ¹² ¡Rü ngëmacëx petaãëğü i guxãma i pema i daxügxü i naãnewa ngëxmagüxe! ¡Natürü pengechaütümüüğü i pema i yea naãne i pecaduãxüwa ngëxmagüxe rü

taxtü i taxüwa ngëxmagüxe! Erü ngëma ngoxo i Chataná rü marü petanügu narütáe. Rü poraãcü nanu i nüma erü marü noxretama i ngunexü nüxü ñayaxü na chixexü naxüxü, erü paxa tá napoxcu”, ñanagürü ga yema naga. ¹³ Rü yema coya ga taxüchixü ga Chataná nagu icúxü rü yexguma nügü yacuèxãchigu ga ñoma ga naãnegu na natáexü, rü ngíwe ningëchigü ga yema nge ga íraxacücü. ¹⁴ Natürü ga Tupana rü ngixü naxüxpexatü ga yema nge. Rü nanaxïyüpepatügüraxü. Rü yemaãcü nachica ga ngextá taxúema íxãpataxüwa ñña naxchaxwa ga yema coya ga Chataná nagu icúxü.. Rü yema nachicawa nixí ga Tupana ngíxna dauxü, rü ngíxü üwemüxü ga tomaëxpüx ga taunecüarü ngãxü. ¹⁵ Rü yema coya ga Chataná rü dexá nügüèxwa ñnaxüxüxëë na wüxi ga natü naxüxücèx, rü yema natümaã ngíxü yachaxëëxücèx ga yema nge. ¹⁶ Natürü ga waixümmü rü ningëx na iyachexëëãxücèx ga yema dexá ga coya nügüèxwa íxüxüxëëxü. ¹⁷ Rü ñuxüchi ga yema coya ga Chataná, rü poraãcüxüchima ngímaã nanu ga yema nge. Rü ñnixü na nügü namaã yadëixücèx ga yema togü ga ngíxãcügü ga yema nge. Rü ngëma ngíxãcügü i ngëma coyamaã nügü dëixü, rü ngëma nixí i ngëma duüxügü i meã Tupanaãrü orega ñnëxü rü meã yaxögüechaxü i Ngechuchu ya Cristuarü ore i aixcüma ixixü. Rü ñuxüchi ga yema coya rü norü numaã taxtü ga taxüãnacügu nayarüñu.

13

Taxre ga ngoxogüchiga

¹ Rū nūxū chadau ga wūxi ga ngoxo ga taxū ga taxtūgu íñuãchixū ga 7 eruxū rü 10 chat-acuxrexū. Rū wūxichigū ga naxchatacuxrewa rü nūxū nayexma ga norū ngèxcueruū. Rū naērugūgu naxūmatū ga ñuxre ga naegagū ga Tupanamaã guxchigagūxū. ² Rū yema ngoxo ga nūxū chadauxū, rü wūxi ga airūū nixī. Rū naxmēxgū rü chatū ga taxūmēxēgürūū nixī. Rū naāx rü wūxi ga aièxrūū nixī. Rū yema coya ga Chataná rü yema ngoxoxū naporaxēē na naxrūū naporaxūcèx rü naxrūū ãēxgacū yīxūcèx na ñoma ga naānemaã inacuáxūcèx. ³ Rū wūxi ga naēruwa ga yema ngoxo, rü nūxū nayexma ga wūxi ga taxū ga norū oxri ga namaã nayuxchaūxū. Natürü ga yema norū oxri rü nūxū nixē, rü naxcèx nitaane. Rū guxūma ga ñoma ga naānecūāx ga duūxūgū rü poraācū yema ngoxomaã nabaixāchie, rü nawe narūxī. ⁴ Rū ga duūxūgū rü yema coya ga Chatanáxū nicuèxūūgū yerü yema ngoxoxū naporaxēē na ãēxgacū yīxūcèx. Rū yexgumarūū ta yema ngoxoxū nicuèxūūgū, rü ñanagürügü:

“¿Texé tangēxma ya ñaã ngoxorūū poraxe? ¿Rü texé tapora na namaã tūgū tadèixū?” ñanagürügü. ⁵ Natürü ga Tupana rü tama yema ngoxona nanachuxu na nūgū yacuèxūūxūcèx rü tacū Tupanamaã yaxugūxūcèx rü ãēxgacū na yīxūcèx ga 42 ga tauemacū. ⁶ Rū yemaācū chixexū naxū ga yema ngoxo. Rū poraācū tacū Tupanamaã nixugü. Rū Tupanamaã naguxchiga, rü napatamaã rü ta naguxchiga, rü tümamaã naguxchiga ya guxāma ya yīxema daxūguxū i naānewa ngēxmagūxe. ⁷ Rū yema coya ga Chataná rü yema ngoxoxū naporaxēē na Tupanaärü

duñxügümañ nügü nadèixücèx ñuxmatáta tüxü nayexera. Rü ãëxgacüxü nayaxĩxëë na namañ inacuáxücèx ga nagúxüraüxü ga duñxügü ga guxüma ga nachiuñanecüñax ga nagúxüraüxü ga nagawa idexagüxü. ⁸ Rü tá ngëma ngoxoxü nicuèxüügü i guxüma i duñxügü i ñoma i nañnewa maxëxü i noxritama nañne üxgu ngeégagüxü nawa i norü popera ya yima pecaduarü ütanücèx yucü i nagu yawügüãxü i ngëma duñxügü i marü Tupana nüxna naxãxü i maxü i taguma gúxü. ⁹⁻¹⁰ Rü ngëxguma texé ãxchixëgu, rü name nixĩ i naga taxĩnü i ñaã tá pemañ nüxü chixuxü. Rü ngëxguma texé tümamañ naxuegugu na tüxü yayauxgüxü, rü noxtacüma tá tiyaxu. Rü ngëxguma texé tümamañ naxuegugu na tüxü yamèxgüxü, rü noxtacüma tá tüxü nimèxgü. Rü ngëmacèx ya yíxema Tupanaärü duñxügü ixĩgüxe, rü woo tacü rü guxchaxü tüxü ngupetügu, rü tanaxwèxe na yaxna namañ taxĩnüèxü rü tayaxögüamaxü. ¹¹ Rü yemawena nüxü chadau ga wüxi ga to ga ngoxo ga taxrechatacuxrexü ga waixüümüñnewa íxüñxü. Rü yema naxchatacuxre rü ñoma carneruchatacuxrerüñ nixĩ. Natürü ga naga rü wüxi ga coya ga taxüchixügarüñ nixĩ. ¹² Rü yexguma yema nüxĩraüxü ga ngoxopëxewa nayexmagu, rü naxrüütama napora. Rü ñoma ga nañnemañ inacuèx, rü nanamu ga ñoma ga nañnewa maxëxü ga duñxügü na yema nüxĩraüxü ga ngoxo ga ixëärü oxríáxüxü na yacuèxüügüxücèx. ¹³ Rü yema ngoxo nanaxü ga taxü ga cuèxruügü ga duñxügü tama nüxü cuáxü na naxügüãxü. Rü daxüwa nanayixëë ga üxü, rü ñoma ga nañnegu

nayi napēxewa ga duūxūgū. ¹⁴ Natürü ga Tupana rü tama yema ngoxona nanachuxu na ñoma ga nañnewa maxēxū ga duūxūgūxū nawomūxēēxū namaã ga yema cuèxruūgū ga yema nūxīraūxū ga ngoxopēxewa naxūxū. Rü yemaãcü ga yema ngoxo rü duūxūgūxū namu na naxūgūāxūcèx ga naxchicünèxã ga yema nūxīraūxū ga ngoxo ga taramaã chexexū rü poraãcü rüxóxū rü tama yuxū. ¹⁵ Rü Tupana rü tama yema to ga ngoxona nanachuxu na namaxēēāxūcèx ga yema nūxīraūxū ga ngoxochicünèxã. Rü yemaãcü ga yema ngoxo rü nanamaxēē ga yema naxchicünèxã na yadexaxūcèx rü na nadaiāxūcèx ga guxūma ga yema duūxūgū ga tama nūxū icuèxūgūxū. ¹⁶ Rü yexgumarūū ta guxūma ga duūxūgūxū namu na norü tūgūnemēxēwa rü ēxna nacatūwa nūxū na nayexmaxūcèx ga wūxi ga cuèxruū ga yema ngoxoéga ixīxū. Rü yemaãcü nanamu ga guxūma ga duūxūgū rü woo buxū rü ēxna yaxū, rü woo duūxūgū i muārü dīeruāxgūxū rü ēxna ngearü dīerūāxgūxū, rü woo duūxūgū i ngearü coriāxgūxū rü ēxna duūxūgū i ixāārü coriāxgūxū. ¹⁷ Rü taxucürüwa texé tūmaārü tacūcèx tataxe rü ēxna tūmaārü tacūmaã tataxe ga yexguma tūmaārü tūgūnemēxēwa rü ēxna tūmacatūwa tūxū natauxgu ga yema ngoxoéga rü ēxna yema ngoxoégaarü cuèxruū ga número. ¹⁸ Rü ñaã orexū na icuāxūcèx, rü tanaxwèxe na tūxū nangēxmaxū i tórü cuèx. Rü yīxema tūxū nangēxmaxē i tūmaārü cuèx, rü name nixī i tanangugū i ngēma número i ngēma ngoxoéga ixīxū. Erü ngēma número rü wūxi i yatüégachirēx nixī. Rü ngēma número rü 666 nixī.

14

Yema 144,000 ga duïxügarü wiyae

¹ Rü yemawena ichadawenü, rü nüxü chadau ga guma pecaduarü ütanücèx yucü ga guma mèxpüne ga Siõügu ãeganeetügu chicü. Rü naxütawa nayexma ga 144,000 ga duïxügü ga nacatüwa ixãegaxü namaã ga guma pecaduarü ütanücèx yucüéga rü Nanatü ya Tupanaega. ² Rü ñuxüchi nüxü chaxñü ga wüxi ga naga ga tagaxü ga daxüguxü ga nañewa inaxüxü ga ñoma taxü i cotüna i chuxchuxügarüü ixixü rü ñoma poraãcü yaduruanexürüü ixixü rü ñoma muxüchixü i duïxügü i arpawa ípaxetaxüürüü ixixü. ³ Rü yema 144,000 ga duïxügü rü nagu nawiyaegü ga wüxi ga yexwacaxüxü ga wiyae napëxewa ga Tupanaärü tochicaxü rü napëxewa ga yema ägümücü ga daxüçüãx ga maxëxü rü napëxewa ga yema 24 ga ãëxgacügü. Rü taxucürüwama texé ga togue nüxü tacuèxéga ga yema wiyae. Rü yema 144,000 ga duïxügüxicatama nixi ga nüxü cuèxgüxü. Rü yema nixi ga Tupana ñoma ga nañewa deixü na namaxëxëãxüçèx. ⁴ Rü yema nixi ga duïxügü ga tama ñoma ga nañeärü ngüchaü i chixexümaã nügü ãüãchiarü maxüãxgüxü rü tama nüxü rüxoexü na Tupanaãxü yaxõgüãxü. Rü nümagü rü yima Tupana Nane ga pecaduarü ütanücèx yucüwe narüxi i ngextá ínaxüxüwa. Rü yemagü nixi ga ñoma ga nañecüãxtanüwa nüxira Tupana naxcèx taxexü na noxrü rü Naneärü duïxügü i üünexü yixigüxüçèx. ⁵ Rü yematanüwa rü

taguma texé nüxü taxĩnü na doraxü yaxugüxü, erü Tupanapëxewa rü nataxuma i norü chixexü.

Orearü ngeruüğü ga daxüçüãxãrü orechiga

⁶ Rü ñuxüchi nüxü chadau ga wüxi ga to ga orearü ngeruü ga daxüguxü ga naãnegu íxexeüxü ga iyangexü ga Tupanaãrü ore i guxügutáma ixixü, na guxü i nachiuãnecüãxgümaã rü nagüxüraüxü i duüxügümaã rü guxüma i duüxügü i nagüxüraüxü i nagawa idexagüxümaã nüxü yaxuxüçèx. Rü yemaãcü inayange ga yema Tupanaãrü ore na guxüma i ñoma i naãnewa maxëxü i duüxügümaã nüxü yaxuxüçèx. ⁷ Rü tagaãcü ñanagürü:

“¡Nüxü pemuüë ya Tupana rü nüxü picuèxüüğü! Erü marü nawa nangu na guxüma i duüxügüna naçaxü. ¡Rü nüxü picuèxüüğü ya yima naxücü i daxüguxü i naãne rü ñoma i naãne rü taxtü i taxü rü guxüma i natüxacüğü!” ñanagürü. ⁸ Rü yemawena nangox ga to ga orearü ngeruü ga daxüçüãx, rü ñanagürü:

“Marü nagu nayarüchixe ya yima ñãne ya taxüne ya Babiróniã, rü nagu napogüe rü nayawëxtaüğüxëë ya norü ñgü. Yerü yema ñãnecüãx rü nanachixexëë ga guxüma ga to ga nachiuãnecüãx ga duüxügü. Rü guxüma ga yema duüxügüxü namu na naxügüãxüçèx ga yema chixexü ga guma ñãnewa naxügüxü ga Tupanapëxewa poraãcü chixexü”, ñanagürü. ⁹⁻¹⁰ Rü yemawena nangox ga to ga orearü ngeruü ga tagaãcü ñaxü:

“Ngëxguma chi texé nüxü icuèxüüğü i ngëma ngoxo rü naxchicünèxãxü ticuèxüüğü rü tügü

itaxãxgu na tümacatüwa rü êxna tümamêxêwa ngêma ngoxoégamaã tacuèxruũãxũ, rü Tupana rü poraãcüxüchi tá tüxũ napoxcu namaã i ngêma poxcu i guxũârü yexera ixĩxũ i nümatama ya Tupana norü numaã namexêẽxũ. Rü üxümaã rü azufre i iyauraxũmaã tá ngúxũ tüxũ ningexêẽ napêxewa i norü orearü ngeruũgü rü napêxewa ya yima Nane ga pecaduarü ütanücèx yucü. ¹¹ Rü naêma ya yima üxü ya nawa Tupana ngúxũ tüxũ ingexêene, rü guxũgutáma ngema nicaixqueecha. Rü bai i írarüwa tá tüxũ narüna i ngêma ngúxũ ya yíxema ngêma ngoxoxũ rü ngêma ngoxochicünèxãxũ icuèxüũgüxe rü tügü ixãxê na ngêma ngoxoégamaã taxãegaxũ. Rü bai i ngunecü rü bai i chütacü tá tüxũ narüna i ngêma ngúxũ”, ñanagürü. ¹² Rü ngêmacèx ya yíxema Tupanaârü duũxũgü ixĩgüxe rü norü orega ñnüèxê rü Ngechuchuaxũ yaxõgüxe, rü name nixĩ na yaxna namaã taxĩnüèxũ rü tayaxõgüamaxũ ega woo tacü rü guxchaxũ tüxũ ngupetügu. ¹³ Rü ñüxũchi nüxũ chaxĩnü ga wüxi ga naga ga daxũguxũ ga naãnewa inaxũxũ ga ñaxũ choxũ:

“¡Naxümatü i ñaã ore i tá cumaã nüxũ chixuxũ! Rü ñüxmaüccüü tá tataãëgü ya yíxema tórü Cori-axũ meã yaxõgüãcüma yuexe. Erü Tupanaãe i Üünexũ rü ñanagürü: ‘Ngũ, ngêmaãcü tá tataãëgü ya yíxema, erü tá itarüngüẽ nüxna i tümaârü puracügü. Rü ngêma mexũ i taxügüxũ rü tümamaã wüxigu daxũguxũ i naãnewa tá naxũ’”, ñanagürü.

Ñoma i naãnewa nanade i ngêma duũxũgü i Tupanaârü ixĩgüxũ

14 Rū ñuxūchi ichadawenü rü nüxū chadau ga wüxi ga caixanexū ga cómuxū. Rū yema caixanexūetüwa narüto ga Tupana Nane ga duūxūxū ixīcū. Rū naēruwa nayexma ga wüxi ga norü ngèxcueruū ga uirunaxcèx. Rū namēxwa nayexma ga wüxi ga cūxchi ga ínapomaguxū ga tēxechixū. 15 Rū Tupanapatawa ínaxūxū ga wüxi ga to ga orearü ngeruū ga tagaācü ñaxū nüxū ga guma caixanexūetüwa rütocü:

“¡Inaxūgü na cunadexū i ngēma duūxūgü i cuxrü ixīgūxū! Erü marü nawa nangu na cugūxūtawa cunagagūxū, erü ngēma curü duūxūgü i ñoma i nañewa ngēxmagūxū rü ínamemare na cunadexū”, ñanagürü. 16 Rū ñuxūchi ga guma yema caixanexūetüwa rütocü rü ñoma trigu i buxuxürü nañeetügu ngīmaā nayabuāchi ga norü cūxchi. Rū nanade ga yema norü duūxūgü ga ñoma ga nañewa yexmagūxū. 17 Rū ñuxūchi daxūguxū i nañewa ngēxmane ya Tupanapatawa ínaxūxū ga wüxi ga to ga orearü ngeruū ga nüxū nayexmacü ga wüxi ga cūxchi ga ínapomaguxcū ga tēxechixcū. 18 Rū yema pumaraarü gutēxeruūtaxmüwa ínaxūxū ga wüxi ga to ga orearü ngeruū ga üxūmaā icuāxū. Rū nūma rü tagaācü ñanagürü nüxū ga yema to ga orearü ngeruū ga yema cūxchi ga ínapomaguxcū ga tēxechixcū nüxū yexmaxū:

“¡Inaxūgü na cunadexū i ngēma duūxūgü i yéa nañewa ngēxmagūxū i tama Tupanaärü ixīgūxū! Erü marü nawa nangu na Tupana napoxcuxū”, ñanagürü. 19 Rū yema orearü ngeruū rü ñoma ga nañeetügu ngīmaā nayabuāchi ga norü cūxchi. Rū nayadexechi ga yema duūxūgü ga tama Tu-

panaãrũ ixĩgũxũ ga ñoma ga naãnewa yexmagũxũ. Rũ wũxi ga taxũ ga nachicagu nanawocu na yexma Tupana norũ numaã nadèixũcèx, ñoma ubagũ imèixtũũxũrũũ. ²⁰ Rũ yema nachica ga ãneãrũ ãxpemawa yexmaxũgu nanadai. Rũ guma nagũ ga yéma íyaxũchicũ, rũ 300 ga kilómetru in-ayarũbaichi, rũ wũxi ga metruarũ ngãxũ nixĩ ga norũ mátama ga guma nagũ.

15

*Tupanaãrũ orearũ ngeruũgũ ga nüxũ nayex-
maxũ ga 7 ga poxcuruũgũ*

¹ Rũ ñuxũchi ga daxũguxũ ga naãnewa rũ nüxũ chadau ga wũxi ga to ga taxũ ga cuèxruũ ga namaã ãbaixãchixũ. Rũ nayexma ga 7 ga orearũ ngeruũgũ ga daxũcũãx ga nüxũ yexmagũxũ ga 7 ga poxcu-ruũ. Rũ yema poxcugu nixĩ ga yagũxũ ga norũ nú ga Tupana. ² Rũ yexgumarũũ ta nüxũ chadau ga ñoma wũxi ga nanaxtaaétũwaraũxũ ga woruarũũ iyauraétũcũxũ ga üxüema nawa inachixũ. Rũ yéma tayexmagũ ga guxema nüxũ rüyexeraxe ga yema ngoxo rũ yema ngoxochicünèxã rũ yema ngoxoéga rũ yema númeru ga yema ngoxoéga ixixũ. Rũ yema nanaxtaaétũraũxũgu tachigũ. Rũ tüxũ nayexmagũ ga tümaãrũ paxetaruũgũ ga arpa ga Tupana tüxna ãxũ. ³ Rũ nagu tawiyaegũ ga Moiché ga Tupanaãrũ duũxũ ixĩcüarũ wiyae. Rũ yexgumarũũ ta nagu tawiyaegũ ga yema wiyae ga guma Tupana Nane ga pecaduarũ ütanücèx yucüarũ ixixũ ga ñaxũ:

“Pa Torũ Cori ya Tupana ya Guxũãrũ Yexera
Poracũx, nataxũchi rũ namexèchi i guxũma

i ngẽma cuxũxũ. Rũ cuma rũ guxũgutáma guxũma i nachiuãnegüarũ ãẽxgacũ quixĩ. Rũ cuma rũ aixcũma meãma namaã icucuèx rũ taguma quidora. ⁴ ¿Rũ texé tãütáma cuxũ tamuũ, Pa Corix? ¿Rũ texé tãütáma cuxũ ticuèxũũ? Erũ cuma rũ cuxicatama nixĩ i üünecũ quiũxũ. Rũ guxũma i nachiuãnecũãx rũ nuã tá naxĩ, rũ tá cuxũ nicuèxũũgũ. Yerũ marũ nüxũ nadaugũ na quixaixcũmaxũ i guxũma i ngẽma nüxũ quixuxũwa rũ aixcũma mea cunangugũxũ i guxũma i ngẽma chixexũ ügũxũ rũ ngẽma mexũ ügũxũ”,

ñanagürũ ga yema wiyae. ⁵ Rũ yemawena ichadawenũ rũ nüxũ chadau ga daxũguxũ ga naãnewa na yawãxnaxũ ga yema nachica ga üünexũ ga Tupanapataarũ aixepewa yexmaxũ ga ngexta namaã ínanguxũgũxũwa ga guma nuta ga Tupanaarũ mugũ nagu ümatücü. ⁶ Rũ guma Tupanapatawa ínachoxũ ga yema 7 ga orearũ ngeruũgũ ga daxũcüãx ga nüxũ nayexmagũxũ ga yema 7 ga poxcuruũgũ. Rũ naxchiru ga mexẽchixũmaã rũ iyauracũxũmaã nixãxchiru. Rũ yema norũ goyeremüũgũ rũ uirunaxcèx nixĩ. ⁷ Rũ ñũxũchi wüxi ga yema ägümücü ga daxũcüãx ga maxũxũ, rũ wüxichigũ ga yema 7 ga orearũ ngeruũgũna nanaxã ga wüxi ga copa ga uirunaxcèx ga Tupana ya guxũguma maxẽchacüarũ nu i ãücũmaxũmaã ixããcuxũ. ⁸ Rũ guma Tupanapata rũ namaã naxããcu ga yema caixema ga Tupana ya mexẽchicũ rũ poracüwa ne üxũ. Rũ taxucürüwama texé yexma taxücu ñũxmata nagú ga yema 7 ga poxcuruũ ga yema 7

ga orearü ngeruüğüaxü yexmaxü.

16

copagü ga Tupanaärü numaã ixããcuxüchiga

¹ Rü ñuxüchi nüxü chaxĩnü ga wüxi ga naga ga tagaãcü guma Tupanapatawa inaxüxü ga ñaxü nüxü ga yema 7 ga orearü ngeruüğü:

“¡Ngema pexĩ, rü naãneetüwa peyabagüãcu i ngẽma 7 i copagü i Tupanaärü nu i ãücümaxümaã ixããcuxü!” ñanagürü. ² Rü yéma naxü ga wüxi ga Tupanaärü orearü ngeruü, rü naãneetügu nayabaãcu ga norü copa. Rü guxüma ga duüxüğü ga yema ngoxoégamaã ixãegaxü rü yema ngoxochicünèxãxü icuèxüüğüxü, rü nawa inayarügogü ga taixna ga nguxuchixü ga taguma ixèxü. ³ Rü yema norü taxre ga orearü ngeruü, rü taxü ga taxtüétügu nayabaãcu ga norü copa. Rü nagüxü nananguxuchi ga dexá, rü ñoma wüxi i duüxü i texé imáxügürüü nixĩ ga dexá. Rü guxüma ga tacü ga taxtüwa maxèxü rü nayue. ⁴ Rü yema norü tomaëxpüx ga orearü ngeruü rü natügüétügu rü natüxacügüétügu nayabaãcu ga norü copa. Rü guxüma ga yema natüğü rü natüxacüğü, rü nagüxü nanacèxichi. ⁵ Rü ñuxüchi nüxü chaxĩnü ga yema Tupanaärü orearü ngeruü ga guxüma ga dexámaã icuáxü ga ñaxü:

“Pa Torü Cori ya Tupana ya Üünecü ya Woetama Yexmaëchacü rü Ñuxma Ngëxmaëchacü, cuma rü wüxi i mexü cuxü na ngẽmaãcü dexá nagüxü cunacèxichixèxü naxchaxwa i ngẽma duüxüğü. ⁶ Yerü nümagü rü nanadai ga yema curü duüxüğü rü curü orearü uruüğü, rü inanaba ga nagü. Rü

ñuxma i cuma rü wüxi i mexü nixĩ i cuxüxü na ngẽma dexá nagüxü cunacèxichixẽẽxü na nawa naxaxegüxücèx. Yerü yema nixĩ ga yema nanaxwèxegüxü rü yemacèx nixĩ ga curü duüxügüxü nadèixü”, ñaxü. ⁷ Rü nüxü chaxĩnü ga wüxi ga naga ga yema pumaraarü gutèxeruütaxmüwa inaxüxü ga ñaxü:

“Ngü, Pa Cori ya Tupana ya Guxüârü Yexera Poracüx, aixcüma nixĩ i namexü i ngẽma cuxüxü”, ñaxü. ⁸ Rü yema norü ägümücü ga orearü ngeruü rü üèxcüétügu nayabaãcu ga norü copa. Rü yemaãcü poraãcü nananaiemaxẽẽ ga üèxcü na yema norü naĩẽmaxümaã ínaguãxücèx ga duüxügü. ⁹ Rü guxüma ga duüxügü rü poraãcü nüxü nanguxema, natürü tama nüxü narüxoe ga nacüma ga chixexü rü tama Tupanaxü nicuèxüügü. Rü naguxchigagüama namaã ga Tupana ya guxüma i ngẽma poxcuruümaã icuácü. ¹⁰ Rü yema norü wüximẽẽxpüx ga orearü ngeruü, rü yema ngoxoarü tohichaxüetügu nayabaãcu ga norü copa. Rü guxüwama ga ngextá äẽxgacü íyĩxüwa ga yema ngoxo, rü naxẽãne. Rü yema na poraãcü nüxü nangúxü ga duüxügü, rü nügü nangõörü conüãxgü. ¹¹ Natürü woo yemaãcü nüxü na nangupetüxü ga duüxügü, rü tama nüxü narüxoechaü ga yema chixexü ga naxügüxü. Natürü yema na poraãcü nüxü nangúxü ga norü taixnagü, rü naguxchigagüama namaã ga Tupana ya daxügücü. ¹² Rü yema norü 6 ga orearü ngeruü, rü yema taxtü ga Euférateétügu nayabaãcu ga norü copa. Rü inayache ga yema taxtü na wüxi ga nama na yĩxücèx naxcèx ga yema nachiuãnegüarü äẽxgacügü ga üèxcü íyarügoxüwa

ne íxǔ. ¹³ Rǔ nǔxǔ chadau rǔ yema coyaǎxwa, rǔ yema nǔxǎraǔxǔ ga ngoxoèxwa, rǔ yema to ga ngoxo ga yema orearǔ uruǔnetaèxwa, rǔ wǔxièxwachigǔ ínaxǔxǔ ga wǔxi ga naǎè ga chixexǔ ga ñoma curururǔǔ íxǎxǔ. ¹⁴ Rǔ yema ngoxoǎègǔ nixǎ ga naxǔgǔxǔ ga yema taxǔ ga cuèxruǔgǔ ga duǔxǔgǔ taxucǔrǔwa ùgǔxǔ. Rǔ yema ngoxogǔ rǔ ínachoxǔ na nangutaquèxexèègǔǎxǔcèx i guxǔma i ñoma i naǎnewa ngèxmagǔxǔ i nachiuǎnegǔarǔ ãèxgacǔgǔ na Tupana ya Guxǔǎrǔ Yexera Poracǔmaǎ nǔgǔ nadaixǔcèx i ngèxguma nawa nanguxgu i naǎneǎrǔ gux. ¹⁵ Natǔrǔ dǔcax, rǔ pexuǎègǔ erǔ tǔrǔ Cori ya Ngechuchu ya Cristu rǔ ñanagǔrǔ:

“Choma rǔ ngǔrǔǎchi taxǔetǎma choxǔ ínanguxèèyane íchangu, ñoma wǔxi i ngǐtèxǎxǔ ínguxǔrǔǔ. Rǔ tataǎè ya yǐxema ímemarexe ñoma wǔxi i duǔxǔ i naxchiru ímexèèxǔrǔǔ na tama tangexchiruxǔcèx rǔ taxǎnexǔcèx i ngèxguma íchanguxgu”, ñanagǔrǔ. ¹⁶ Rǔ yema ngoxogǔ, rǔ nanangutaquèxexèè ga guxǔma ga ñoma ga naǎnewa yexmagǔxǔ ga nachiuǎnecǔǎxǔgǔarǔ ãèxgacǔgǔ. Rǔ yema nachica ga nawa nangutaquèxegǔxǔ, rǔ Armaguedóǔgu naxǎega i Yudiǔgǔgawa. ¹⁷ Rǔ yema norǔ 7 ga orearǔ ngeruǔ, rǔ buanecǔgumare nayabaǎcu ga norǔ copa. Rǔ guma Tupanapata ya daxǔguxǔ i naǎnewa ngèxmanewa ínanaxǔ ga wǔxi ga naga ga tagaxǔ ga yema Tupanaǎrǔ tochicaxǔwa ínaxǔxǔ ga ñaxǔ:

“Marǔ ningu”, ñaxǔ. ¹⁸ Rǔ nibèixbèxane, rǔ poraǎcǔ nicuxcuane, rǔ niduruane. Rǔ poraǎcǔ naxǎǎxǎchiane. Rǔ noxri Tupana duǔxǔgǔxǔ

üxgumama rü taguma nayexma ga wüxi ga ãxãchiane ga yemarüü poraxü. ¹⁹ Rü guma ãne ga taxüne ga Babiróniã, rü tomaẽxpüxgu ningüxyeane. Rü guma ãnegü ga ñoma ga naãnewa yexmagüne rü niwèxtaügü. Rü Tupana rü nüxna nacuaxãchi ga guma ãne ga Babiróniãärü chixexü. Rü yemacèx norü numaã poraãcü nanapoxcu ga guma ãne, yerü poraãcüxüchi namaã nanu. ²⁰ Rü guxüma ga capaxügü rü guxünema ga mèxpünegü, rü inayarüxogü. ²¹ Rü daxüwa narüyi ga gáuxü ga itapütaxü, rü duüxügüétügu nayi. Rü wüxipütachigü ga yema gáuxü, rü 40 ga kilogu nixi ga nayaxü. Rü ga duüxügü rü Tupanamaã naguxchigagü nagagu ga yema poxcuruü ga gáuxü, yerü poraãcü nüxü nangux ga yema poxcu ga Tupana namaã napoxcuexü.

17

Ïãne ga Babiróniã ga wüxi ga nge ga ngẽãxü-chicügu ixuxüne

¹ Rü yema 7 ga orearü ngeruügü ga nüxü yexmagüxü ga 7 ga copagü, rü yematanüwa rü wüxi ga orearü ngeruü, rü chauxcèx nixü, rü ñanagürü choxü:

“¡Nuã naxü! Rü tá cuxü nüxü chadauxëë i tacü tá nixi i ngîrü poxcu i ngëma nge i ngeãxüchicü i taxü i dexágüétüwa rütöxcü. ² Rü ñoma i naãnewa ngëxmagüxü i nachiuãnegüarü ãëxgacügü, rü ngîmaã namaxë, rü yemaãcü poraãcü chixexü naxügü. Rü guxüma i ñoma i naãnecüãx, rü ngîrü chixexü nüxna naxüe”, ñanagürü. ³ Rü yexguma Tupanaãë i Üünexü yemaãcü choxü ngoxetüxëëgu,

rü yema orearü ngeruŭ rü wüxi ga nachica ga ngextá taxúema íxãpataxüwa choxü naga. Rü yema ngixü chadau ga wüxi ga nge ga wüxi ga ngoxo ga dauxüetüwa rütöxcü. Rü yema ngoxo rü guxüwama naxãegaxüne, rü yema naegagü rü Tupanamaã naguxchiga. Rü 7 nixi ga naëru rü 10 ga naxchatacuxre. ⁴ Rü yema nge rü wüxi ga naxchiru ga dauxracharaxü rü dauxümaã íxãxchiru. Rü uirumaã rü nutagü ga mexëchicümaã ingãxãê. Rü ngixmëxwa ngixü nayexma ga wüxi ga copa ga uirunaxcèx. Rü yema copa rü namaã naxããcu ga nagúxüraüxü ga yema Tupanapëxewa chixexü rü nagúxüraüxü ga chixexügü ga yema nge üxü. ⁵ Rü ngicatügu naxümatü ga wüxi ga naega ga taxúema nüxü cuáxü na ñuxü ñaxüchiga yiixü. Rü yema naega rü ñanagürü:

“Rü yima Babiróniã rü guxüma i ngema duüxügü i chixexü ügüxü i ñoma i naãnewa maxëxüarü mamá nixi”, ñanagürü. ⁶ Rü ngixü chadau ga yema nge ga na nangãxüxü namaã ga guma nagü ga yema duüxügü ga Tupanaärü ixigüxü rü yema duüxügü ga Ngechuchuarü orexü na yaxugüxcèx dèixü. Rü yexguma yemaxü chadèuxgu, rü chabaixãchi. ⁷ Rü yexguma ga yema orearü ngeruŭ rü ñanagürü choxü:

“¿Tacüçèx cubaixãchi? Düçèx, tá cumaã nüxü chixu na tacüchiga yiixü i ngëma nge, rü tacüchiga yiixü i ngëma ngoxo i 7 eruxü rü 10 chatacuxrexü i naetüwa natoxü. ⁸ Rü ngëma ngoxo i nüxü cud-auxü, rü yema nixi ga nuxcümáxüchi maxchiréxü natürü ñuxma rü marü yuxü rü ngëma äxmaxü i taxuguma iyacuáxüwa ngëxmaxü. Natürü paxa tá ngëma íxüxüxü, rü ñuxüchi ngëma nachica i

guxüğutáma nagu napoxcuxűwa tá ũxű. Rű ngěma ngoxoma ã tá nabaixãchiãęgű i ngěma duűxűgű i ñoma i naãnewa maxěxű i tama nawa ngoxégagűxű i ngěma Tupanaärű popera i noxritama naãne ixűgűgu Tupana nagu yawűgűxű i ngěma duűxűgű i nűxű nangěxmaxű i maxű i taguma gűxű. Rű nűmagű i ngěma duűxűgű rű aixcűma tá namaã nabaixãchiãęgű i ngěxguma nűxű nadaugűgu i ngěma ngoxo ga nuxcűmaxűchi maxchirěxű rű yuxű natürű wena táxarű ínguxű. ⁹ Rű ñaã nixĩ i wűxi i ore naxcèx i ngěma duűxűgű i nűxű natauxchaxű na nűxű nacuèxgűxű. Rű ngěma 7 i naėru i ngěma ngoxo, rű yima nixĩ ya 7 ya mèxpűnechiga. Rű yima 7 ya mèxpűneetűwa nixĩ i natoxű i ngěma nge. Rű ngěxgumarűű ta i ngěma naėrugű, rű 7 i nachiűãnegűarű ãěxgacűgűchiga nixĩ. ¹⁰ Rű wűximěěxpűx i ngěma ãěxgacűgű rű marű togű nűxű narűyexeragű, rű ñuxma rű marű tama ãěxgacűgű nixĩgű. Rű ngěma norű 6 i ngěma ãěxgacűgű, rű nűma rű ñuxma rű ãěxgacű nixĩ. Rű ngěma norű 7 tá nixĩ i yixcűra ínguxű. Natürű ngěxguma ínanguxgu i ngěma norű 7 i nawa iyacuáxű i ngěma ãěxgacűgű, rű paxaãchimare tá nixĩ i ãěxgacű yĩxű. ¹¹ Rű ngěma ngoxo ga nuxcűmaxűchi maxchirěxű rű ñuxma rű marű yuxű, rű ngěma nixĩ i norű 8 i ngěma ãěxgacűgű. Rű nűma rű ngěma 7 tanűxű nixĩ. Natürű i nűma rű ngěma nachica i guxüğutáma nagu napoxcuxűwa naxű. ¹² Rű ngěma 10 i naxchatacuxre i nűxű cudauxű, rű 10 i nachiűãnegűarű ãěxgacűgűchiga nixĩ. Natürű i nűmagű rű tauta inanaxűgűe na duűxűgűmaã inacuèxgűxű. Natürű yixcűra tá

nanayauxgü i pora na wüxítátama i ora ngêma ngoxomaã wüxigu ãëxgacügü yixĩgüxücèx. ¹³ Rü ngêma 10 i ãëxgacügü rü wüxigu nagu narüxĩnüë na ngêma ngoxona naxãgüãxücèx i norü pora, na ngêma ngoxo namaã icuáxücèx. ¹⁴ Rü ñuxüchi i ngêma ãëxgacügü rü ngêma ngoxo rü tá nügü nadai namaã ya yima Tupana Nane ga pecaduarü ütanücèx yucü. Natürü ya yima Tupana Nane rü tá nüxü narüyexera, erü nüma rü guxü i corigüarü Cori nixĩ, rü guxü i nachiuãnegüarü ãëxgacügüarü ãëxgacü nixĩ. Rü yixema namücügü ixĩgüxe, rü yixemagü tixĩgü ya Tupana tüxü dexe rü tümacèx naçaxe. Rü tümagü rü aixcüma naga taxĩnüë”, ñanagürü choxü. ¹⁵ Rü yema orearü ngeruü rü ñanagürü ta choxü:

“Ngêma taxü i dexá i nüxü cudaduxü i naetüwa natoxü i ngêma nge i ngêãëxüchicü, rü nagüxürauxü i duüxügüchiga nixĩ, rü guxüma i duüxügü i to i nagawa idexagüxüchiga nixĩ, rü guxüma i nachiuãnecüãxgü i duüxügüchiga nixĩ. ¹⁶ Rü ngêma 10 i naxchatacuxre i nüxü cudaduxü i nüxü ngëxmaxü i ngêma ngoxo, rü tá ngêma nge i ngêãëxüchicüchi naxaie. Rü tá ngêma ngena nanapuxü i guxüma i tacü i ngixü ngëxmaxü, rü ngêmaãcü ngexchiruãcüma tá ngëxma irüxãüx. Rü tá ngixü nangõxgü, rü üxüwa tá ngixü nigugü. ¹⁷ Yerü ga Tupana rü yema 10 ga ãëxgacügüxü nagu narüxĩnüëxëë na naxügüãxücèx i ngêma nanaxwëxexü i nüma ya Tupana. Rü ngëmacèx i ngêma ãëxgacügü, rü tá wüxigu nagu narüxĩnüë na ngêma ngoxoxü naporaxëëgüxü na norü ãëxgacü yixücèx ñuxmatáta Tupana yanguxëë i ngêma

nüxü yaxuxü. ¹⁸ Rü ngẽma nge i ngĩxü cudèuxcü, rü yima nixĩ ya yima ããne ya taxüne ya guxüma i nachiuãnegüarü ãëxgacügümaã icuáxüne”, ñanagürü.

18

Nagu nayarüchixe ga ããne ga Babiróniã

¹ Rü yemawena nüxü chadau ga wüxi ga to ga orearü ngeruü ga daxüguxü ga naãnewa íruxixü ga taxü ga ãëxgacü ixixü. Rü yema orearü ngeruüarü yauracüxümaã nangóone ga ñoma ga naãne. ² Rü tagaãcü ñanagürü:

“Marü nagu nayarüchixe ya yima ããne ya Babiróniã ya itaégacüxüne. Rü ñuxma rü ngoxogüchiü nixĩ rü nagúxüraüxü i naãe i chixexügüchiü nixĩ. Rü ñuxma rü ngẽxma naxãchiü i nagúxüraüxü i ngurucugü rü werigü i chixexü i duüxügü naxchi aiexü. ³ Yerü guxüma ga nachiuãnecüãxgü, rü guma ããnearü chixexü nüxna naxüe. Rü norü ãëxgacügü, rü yéma poraãcü chixri namaxẽ. Rü guxüma ga ñoma ga nachiuãnecüãxgü ga taxetanüxügü, rü nügü namuãrü dïeruãxëegü namaã ga yema ããnearü yemaxügü ga tama Tupanapëxewa mexü”, ñanagürü. ⁴ Rü ñuxüchi nüxü chaxĩnü ga to ga naga ga daxüguxü ga naãnewa inaxüxü ga ñaxü:

“¡Dücèx i guxãma i pema ya chorü duüxügü ixĩgüxe, rü ipechoxü nawa ya yima ããne na tama ngẽma ããnecüãxrüü pipecaduãxgüxücèx rü tama nagu peyixücèx i ngẽma poxcu i tá yima ããnewa nguxü! ⁵ Erü ngẽma ããnecüãxãrü pecadugü, rü nügüétüwa narünucue, rü düxwa

marü daxüguxü i naãnewa nangu. Rü ñuxma ya Tupana rü nüxna nacuèxãchi i ngëma chixexü i naxügüxü, rü ngëmacèx tá yima iãnexü napoxcu. ⁶ Rü ngëma poraãcü chixexü na naxügüxürüü, rü ngëxgumarüü tá ta nixĩ na chixexümaã nüxü penaxütanüxü i pemax. ¡Rü ñuxma na ngëma iãnecüãx togümaã chixexü naxügüxü, rü taxreëxpüxcüna tá penachixexëe i pemax! ¡Rü ngëma chixexü ga yema iãnecüãx togücèx mexëëgüxü, rü pema rü taxreëxpüxcüna tá ngëmaãcü naxcèx penamexëe! ⁷ ¡Rü ngëma na nügü yacuèxüügüxü rü mexëchixüwa na namaxëxü, rü ngëxgumarüü tá ta nixĩ na ngüxü nüxü pingexëëgüxü rü ngechaü nüxü pingexëëgüxü! Erü ñuxma i ngëma iãnecüãx rü nügüãëwa ñanagürügü: ‘Yixema rü ñoma wüxi i ãëxgacürüü mexëchixüwa tangëxmagü. Rü tagutáma wüxi i yutexürüü tangechaügü’, ñanagürügü nügüãëwa i ngëma iãnecüãx. ⁸ Rü ngëmacèx tá nixĩ i wüxitátama i ngunexügu ínanguxü i ngëma iãneärü poxcuruü. Rü ngëma iãnecüãx rü ngúanemaã tá nayue, rü poraãcü tá nangechaügü, rü poraãcü taiya tá nüxü nangux, rü norü iãne rü üxümaã tá nigu. Erü naporaxüchi ya yima Tupana ya guxüärü Cori ixĩcü i ngëma iãnexü poxcucü”, ñanagürü ga yema naga. ⁹ Rü ngëma nachiüãnegüarü ãëxgacügü ga yema iãnewa poraãcü chixri maxëxü rü mexëchixüwa yexmagüxü, rü tá poraãcü norü ngechaümaã yima iãnecèx naxauxe i ngëxguma nüxü nadaugügu i ngëma üxüema i namaã yaxaxü. ¹⁰ Natürü ngëma ãëxgacügü rü ngëma poxcuxü na

namuñëxüchëxwa rü tá yaxüwa nüxü narüdaunü, rü ñanagürügü tá:

“Cungechaütümüü, Pa Itaégacüxüne ya Ñane ya Babirónia ya Guxü i Nachiüñanegümaã Porachirénex. Erü wüxitama i oragu cuxcèx ñangu i curü poxcu”, ñanagürügü tá. ¹¹ Rü guxüma i ñoma i nañecüñax i taxetanüxü, rü tá poraãcü norü ngechaümaã naxcèx naxauxe ya yima ñane. Erü marü taxúetáma naxcèx nüxü tataxe i norü ngëmaxügü i ngëma nangegüxü. ¹² Rü marü taxúetáma naxcèx nüxü tataxe i norü uiru, rü norü dñerümü, rü norü nutagü i mexëchixü, rü naxpügü i mexëchixü i dauxracharaxü rü idauxcharaü i ngëma nangegüxü. Rü ngëxgumarüü ta taxúetáma naxcèx nüxü tataxe i nagüxüraüxü i norü nañchipanügü i yixixü, rü norü ngëmaxügü i marfilnaxcèx rü mürapewa i mexëchixüñaxcèx rü cobrenaxcèx rü fierunaxcèx rü nutanaxcèx i ngëma nangegüxü. ¹³ Rü taxúetáma naxcèx nüxü tataxe i norü canela rü togü i norü üexüwemüxügü i yixixü, rü pumaratëxe i guruü ixixü, rü togü i pumaragü i yixixü, rü binügü rü chixügü, rü arina i mexëchixü, rü trigu i ngëma nangegüxü. Rü ngëxgumarüü ta ngëma nanagagü i wocagü, rü carnerügü, rü cowarügü, rü autügü i cowaru itüchigüxü, rü duüxügü i puracüruügü. Rü ngëmaãcü woo duüxëgü rü ngëma tüxü nagagü na tümamaã nataxegüxüçèx. ¹⁴ Rü ngëma taxetanüxü, rü ñanagürügü tá nüxü ya yima ñane:

“Cuwa rü marü nataxuma i ngëma orix i curü duüxügüarü me ixixü. Rü marü nataxuma i guxüma i ngëma meruügü ga noxri cuxü yexmaxü, rü tagutáma wenaxãrü

cuxŭ nangēxma”, ñanagürügü tá. ¹⁵ Rü ngēma taxetanüxŭ i guxŭma i ngēma orixgümaã rü ngēma meruŭgümaã taxegüxŭ rü guma ñānegu nügü muārü dīeruāxēxŭchigüxŭ, rü yaxŭwa tátama nüxŭ narüdaunü ya yima ñāne, erü nüxŭ namuŭē i ngēma poxcu i yima ñānexŭ üpetüxŭ. Rü tá poraãcü norü ngechaŭmaã naxauxe. ¹⁶ Rü ñanagürügü tá:

“Nangechaŭtümüŭ ya yima ñāne ya itaxégacüxüne. Erü noxri rü ñōma wüxi i nge i mexēchixŭ i naxchiru i dauxracharaxŭ rü dauxcharaxŭmaã āxchirucü i uirumaã rü nutagü ya mexēchicümaã ngèxāēxcürüŭ nixī. ¹⁷ Natürü ngürüāchi nagux i guxŭma i ngēma ñāneärü meruŭgü”, ñanagürügü tá. Rü guxŭne ya wapurugüarü āēxgacügü, rü guxŭma i norü duŭxügü ya yima wapuruwa puracüexŭ, rü guxŭma i duŭxügü ya yima wapurugu ŭxŭ, rü guxŭma i taxetanüxügü i wapurugu yarüxŭñüxŭ, rü yaxŭwa tátama nayachaxgütanüāchi, rü ngēma tá nüxŭ narüdaunü. ¹⁸ Rü ngēxguma nüxŭ nadaugügu i norü caxixŭ na yaxaxŭ ya yima ñāne, rü tagaãcü tá ñanagürügü:

“Nataxuma ya náí ya ñāne ya daa ñāne ya itaxégacüxünerüŭ ixŭxüne”, ñanagürügü. ¹⁹ Rü norü ngechaŭmaã nügüétügu tá waixŭmü nagünagügü, rü tá poraãcü naxauxe, rü tagaãcü ñanagürügü tá:

“Nangechaŭtümüŭ ya yima ñāne ya itaxégacüxüne. Rü noxri rü norü yemaxŭgümaã nügü nimuārü dīeruāxēēgü ga guxŭne ga wapurugüarü yoragü. Natürü i ñuxma rü ngürüāchi wüxi i oragutama rü inayarüxo i guxŭma i ngēma. ²⁰ Natürü ñuxma na napoxcuxŭ

ya yima ñãne, rü name nixĩ i petaãëgü i pema i daxüguxũ i naãnewa ngëxmagüe, rü pema i Tupana pexũ imugüe, rü pema i Tupanaãrũ orexũ ixugüe, rü guxãma i pema i Tupanaãrũ duũxügü ixĩgüe. Erü ñuxma na napoxcuxũ ya yima ñãne, rü ngëmaãcü Tupana pexũ naxütanü naxcèx ga yema chixexũ ga pemaã naxügüxũ ga guma ñãnecũãx”, ñanagürügü. ²¹ Rü ñuxüchi wüxi ga Tupanaãrũ orearü ngeruũ ga daxücũãx rü nanangenagü ga wüxi ga nuta ga taxüchicü ga ñoma tacüarü caruürü ixĩcü. Rü yema orearü ngeruũ rü taxtü ga taxügu nanaña ga guma nuta ga taxüchicü, rü ñanagürü:

“Ngëxgumarüũ tá quixĩ na icuyarüxoxũ, Pa ñãne ya Itaxégacüxüne ya Babiróniãx, rü tagutãma texé wena cuxũ nadau. ²² Rü tagutãma wena curü ñtamügüwa texé nüxũ taxĩnü i paxetaruũgü i arpagü rü quenagü rü cornetagü. Rü ngëxgumarüũ ta cuwa nataxütãma i puracütanüxügü i tacüwa puracüexũ, rü tagutãma texé nüxũ taxĩnü na cuwa ñapuracüexũ i chawüarü caruũgü. ²³ Rü marü tagutãma texé nüxũ tadau i cuwa i omü. Rü marü tagutãma texé nüxũ taxĩnü i ngügüchigaarü petagüarü cuxcuane. Rü ngëmaãcü tá cumaã nangupetü woo ga noxri rü yema taxetanüxũ ga cuwa taxegüxũ rü guxüma ga togü ga taxetanüxũãrü yexera nixĩgü. Rü ngëmacèx tá poraãcü cupoxcu nagagu ga yema chixexũ ga namaã cunawomüxëëxũ ga guxüma ga togü ga nachiuãnecũãx ga duũxügü”, ñanagürü. ²⁴ Yerü guma ñãnecũãx ga duũxügü nixĩ ga nadëixũ rü inabaxëëgüxũ ga nagü ga Tupanaãrũ orearü

uruügü rü yema duüxügü ga Tupanaärü ixīgüxü rü guxüma ga duüxügü ga ñoma ga naãnegu Tupanaarü oregagu nadèixü.

19

¹ Rü yemawena nüxü chaxĩnü ga muxüma ga duüxügüga ga daxüguxü ga naãnewa tagaãcü ñagüxü:

“¡Ngĩxã Tupanaxü ticuèxüügü! Erü nüma nixĩ i tüxü namaxëxëxü. Rü nüma ya tórü Tupana nixĩ i guxüärü yexera namexëchixü rü naporaxüchixü. ² Rü nüma rü aixcüma meãma nanangugü i guxüma i duüxügüarü maxü, rü aixcüma tá nanapoxcue i ngëma chixexü ügüxü. Rü ngëmacèx marü nanapoxcu ya yima ñãne ya itaxégacüxüne ya chixene ya norü chixexümaã nachixexëene i guxüma i ñoma i naãnecüãx i duüxügü. Rü ñuxma i nüma ya Tupana rü norü duüxügü ga guma ñãnecüãx dèixüxü naxütanü”, ñanagürügü. ³ Rü ñuxüchi wenaxärü ñanagürügü:

“¡Ngĩxã Tupanaxü ticuèxüügü! Erü ngema norü caxixü na yaxaxü ya yima ñãne, rü tagutáma ngéma nayarüxo”, ñanagürügü. ⁴ Rü yema 24 ga ãëxgacügü rü yema ägümücü ga daxücüãx ga maxëxü rü yexma nanangücuchitanü, rü Tupana ya norü tochicaxüwa rütocüxü nicuèxüügü. Rü ñanagürügü:

“Rü ngëmaãcü yĩ. ¡Rü ngĩxã nüxü ticuèxüügü ya tórü Cori!” ñanagürügü. ⁵ Rü ñuxüchi yema tochicaxüütawa inanaxü ga wüxi ga naga ga ñaxü:

“Name nixĩ i tórü Tupanaxü picuèxüügü i guxüma i pemax Pa Buxügü rü Pa Yaxügüx i norü

duũxũgũ na pixĩgũxũ rũ nüxũ na pemuũẽxũ”, ñaxũ.

Tupana Nane ga pecaduarũ ütanicèx yucüarũ ngĩgüarũ petachiga

⁶ Rũ ñuxũchi nüxũ chaxĩnü ga tacü ga ñoma muxũchixũ ga duũxũgũ idexagũxũrũ ixĩxũ ga ñoma taxũ i dexá i chuxchuxũrũ ixĩxũ ga ñoma poraãcü yaduruanexũrũ ixĩxũ ga ñaxũ:

“¡Ngĩxã Tupanaxũ ticuèxũgũ! Erũ nüma ya tórũ Cori ya Tupana ya guxũârũ yexera poracü, rũ marũ ningucuchi na guxũmaã inacuáxũ. ⁷ ¡Rũ ngĩxã tataãgũ rũ guxũ i tórũ taãemaã nüxũ ticuèxũgũ! Erũ marũ nawa nangu na iyangĩxũ ya yima Tupana Nane ga pecaduarũ ütanicèx yucü. Rũ ngẽma norũ duũxũgũ i ñoma namèxrü ixĩgũxũ rũ marũ nügũ ínimexẽgũ. ⁸ Rũ yima Tupana Nane rũ ngẽma nüxũ yaxõgũxũxũ namu na mexẽchixũ rũ cómuxũ rũ iyauracüxũ i naxchirumaã na yaxãxchiruxũ. Rũ ngẽma naxchiru i mexẽchixũ rũ ngẽma nixĩ i ngẽma duũxũgüarũ maxũ i mexũchiga”, ñanagürügũ. ⁹ Rũ ñuxũchi ga Tupanaârũ orearũ ngeruũ, rũ ñanagürũ choxũ:

“Chanaxwèxe i cunaxümatü i ñaã ore i cumaã tá nüxũ chixuxũ: “Tataãgũ ya yixema tũxna naxuxe i norũ ngĩgüarũ petawa ya yima Tupana Nane ga pecaduarũ ütanicèx yucü’”, ñanagürũ. Rũ ñuxũchi ñanagürũ ta:

“Ngẽma ore i cumaã nüxũ chixuxũ, rũ Tupanaârũ orexüchitama nixĩ”, ñanagürũ. ¹⁰ Rũ choma rũ yema orearũ ngeruũpẽxegu chacaxãpũxũ na nüxũ chicuèxũxũcèx. Natürũ ga nüma rũ ñanagürũ choxũ:

“¡Tãxũ i ngẽma cuxũxũ! Erũ choma rũ ta Tupanaãrũ duũxũ chixĩ, ngẽxgumarũũ i cuma rũ cueneẽgũ i Ngechuchuarũ ore i aixcũma ixĩxũ ixõgũechaxũrũũ ta chixĩ. Rũ name nixĩ i Tupanaxũ quicuèxũũ”, ñanagũrũ. Erũ ngẽma ore i Ngechuchuchiga ixĩxũ, rũ yematama ore nixĩ ga Tupanaãrũ orearũ uruũgũ nüxũ ixugũexũ ga yexguma Tupanaãe i Üünexũ nawa ideaxgu.

Guma Tupana Nane ga cowaru ga cómuxũetũgu tonagũcũchiga

¹¹ Rũ ñuxũchi nüxũ chadau ga daxũguxũ ga naãne na yawãxnaxũ. Rũ yéma nangox ga wũxi ga cowaru ga cómuxũ. Rũ guma naetũwa rütocũ rũ Ixaixcũmacũ rũ Aixcũma Yanguxẽecũ nixĩ i naega. Rũ nüma rũ aixcũma guxũma i duũxũgũarũ maxũxũ nacuèx, rũ aixcũma tá guxũma i ngẽma chixexũ ügũxũmaã nügũ nadai rũ tá nanapoxcue. ¹² Rũ naxetũgũ, rũ ñoma üxüemarũũ niyauracũũ. Rũ naẽruwa rũ namu ga norũ ngèxcueruũgũ. Rũ nacatũgu naxümatũ ga wũxi ga naega ga nüxĩcatama nüxũ nacuáxũ. ¹³ Rũ wũxi ga naxchiru ga ducharaxũgu nicux. Rũ naega rũ Tupanaãrũ Ore nixĩ. ¹⁴ Rũ nawe narũxĩ ga guxũma ga norũ churaragũ ga daxũcũãx. Rũ nümagũ rũ naxchiru ga imexẽchixũ rũ cómuxũmaã nixãxchiru. Rũ cowarugũ ga icómuxũetũgu naxĩ. ¹⁵ Rũ naãxwa nayexma ga wũxi ga tara ga tẽxechixũ na yemamaã napíexẽãxũcèx i guxũma i ngẽma duũxũgũ i tama nüxũ yaxõgũxũ. Rũ tá nüma nanaxwèxexũãcũma ngẽma duũxũgũmaã inacuèx. Rũ nüma rũ tá poraãcũ ngẽma duũxũgũ i tama yaxõgũxũxũ napoxcu namaã i ngẽma poxcu ya

Tupana ya Guxũxũ Rũporamaẽcũ norũ numaã mexẽẽxũ. Rũ ñoma ubagũ i norũ maĩxruũwa imèixtũũxũrũũ tá nixĩ na napoxcueãxũ. ¹⁶ Rũ naxchirugu rũ naperemagu naxũmatũ ga wũxi ga naega ga ñaxũ:

“Guxũma i nachiũãnegũarũ ãẽxgacũgũarũ ãẽxgacũ, rũ guxũma i corigũarũ Cori ixĩcũ”, ñaxũ. ¹⁷⁻¹⁸ Rũ ñuxũchi nũxũ chadau ga wũxi ga Tupanaãrũ orearũ ngeruũ ga daxũcũãx ga uèxcũgu chixũ. Rũ nũma rũ tagaãcũ ñanagũrũ nũxũ ga guxũma ga ngurucugũ ga yexma ixexexũtanũxũ:

“¡Nuã pexĩ rũ pengutaquẽxegũ naxcèx i õna i taxũ i Tupana pexcèx mexẽẽxũ na penangõxũcèx i nachiũãnegũarũ ãẽxgacũgũmachi, rũ churaragũarũ ãẽxgacũgũmachi, rũ yatũgũ i poraxũchixũmachi, rũ cwarugũmachi, rũ ngẽma cwaruètũgu ìxũ i duũxũgũmachi, rũ ngẽma duũxũgũ i coriãxgũxũmachi rũ ngẽma ngearũ coriãxgũxũmachi rũ ngẽma buxũgũmachi rũ ngẽma yaxũgũmachi!” ñanagũrũ. ¹⁹ Rũ ñuxũchi nũxũ chadau ga yema nũxĩraũxũ ga ngoxo rũ guxũma ga nachiũãnegũarũ ãẽxgacũgũ ga norũ churaragũmaã yema ngutaquẽxegũxũ na nũgũ nadèixũcèx namaã ya yima cwaruètũgu ìxũcũ rũ norũ churaragũ. ²⁰ Rũ yema nũxĩraũxũ ga ngoxo rũ niyaxu. Rũ wũxigu namaã niyaxu ga yema to ga ngoxo ga orearũ uruũneta ixĩxũ ga yema nũxĩraũxũ ga ngoxopèxewa naxũxũ ga cuèxruũgũ ga duũxũgũ tama nũxũ cuáxũ na naxũgũãxũ. Rũ yema cuèxruũgũmaã nixĩ ga nawomũxẽẽãxũ ga yema duũxũgũ ga nũxũ icuèxũũgũxũ ga naxchicũnèxã ga yema nũxĩraũxũ

ga ngoxo rü nügü ixãgüxü na yema ngoxoégamaã na yaxüéagüxü. Rü yema nüxĩraüxü ga ngoxo rü yema to ga ngoxo ga orearü uruñneta ixĩxü, rü wüxigu maxẽxüma nawa nawoü ya yima naxtaa ya üxümaã iyaurachiüne ya azufremaã ixaxüne. ²¹ Rü yema tara ga tẽxechixü ga guma cowaruétüwa rütocüèxwa yexmaxümaã nanadai ga yema ngoxogüarü ngüxẽëruügü ga ãëxgacügü rü norü churaragü. Rü guxüma ga ngurucugü, rü yemamachimaã nangãxcharaügü.

20

Chataná rü 1,000 ga taunecü ninèix

¹ Rü yemawena nüxü chadau ga wüxi ga Tupanaärü orearü ngeruü ga daxügüxü ga naãnewa íruxĩxü. Rü naxmẽxwa nayexma ga yema ãxmaxü i taxuguma iyacuáxüärü chawi rü ñuxüchi wüxi ga cadena. ² Rü yema Tupanaärü orearü ngeruü rü yema coyaxü niyaxu. Rü yematama coya nixĩ ga yema nuxcümaüxü ga ãxtape ga ngoxo ga Chataná ixĩxü. Rü yema orearü ngeruü rü 1,000 ga taunecügücèx nayanèix. ³ Rü yema orearü ngeruü rü yema ãxmaxü i taxuguma iyacuáxügu nayatèxcuchi. Rü ñuxüchi yexma meãma nanawãxtau na nüma ga Chataná rü marü taguma wenaxärü duüxügüxü nawomüxẽëxücèx ñuxmatáta 1,000 ya taunecü ngẽxma yangeã. Rü ngẽxguma marü yanguxẽëãgu ya yima 1,000 ya taunecü, rü tá paxaxãchi nayangẽx. ⁴ Rü ñuxüchi nüxü chadau ga ñuxre ga tochicaxügü. Rü yema tochicaxüwa tarütogü ga guxema Tupanaxütawa nayauxgüxe ga pora na duüxügüxü ticagüxücèx.

Rü yexgumarüü ta nüxü chadau ga naãëgü ga yema duüxügü ga Ngechucharü orexü na yaxugüxcèx nadaünaägüxü. Rü yema nixĩ ga duüxügü ga meãma nüxü ixugüxü ga Tupanaärü ore rü tama yema ngoxoxü icuèxüügüxü rü bai ga yema ngoxochicünèxãxü icuèxüügüxü, rü tama nügü ixãgüxü na nacatüwa rü êxna naxmëxwa yema ngoxoégamaã yaxãëgaxü. Rü nüxü chadau ga wena na namaxëxü, rü 1,000 ga taunecü Cristumaã wüxigu ãëxgacü nixĩgü. ⁵ Rü yemagü nixĩ ga nüxĩrama írüdagüxü. Natürü ga yema togü ga yuexü rü täütáma namaxë ñuxmatáta yima 1,000 ya taunecüguwena. ⁶ Rü tataãëgü ya yixema tüxira írüdagüxe erü Tupanaärü duüxügü tixĩgü. Rü ngëma Tupanaärü poxcu rü marü täütáma tümacèx nixĩ. Rü tá Tupanaärü rü Cristuarü ngüxëeruügü tixĩgü. Rü 1,000 ya taunecü tá Cristumaã ãëxgacügü tixĩgü.

ngoxo i Chataná rü marü nagu nayarüchixe

⁷ Rü ngëxguma marü nangupetügu ya yima 1,000 ya taunecü, rü Chataná rü tá ningëx i ngëma ínapoxcuxüwa. ⁸ Rü nüma i Chataná rü tá ínaxüxü na yawomüxëëxüxcèx i guxüma i ñoma i naãnecüãx i duüxügü rü Goga rü Magoga na ngëmagüxü nangutaquëxëxüxcèx na Tupanaärü duüxügümaã nügü nadëixüxcèx. Rü ngëma Chatanáärü churaragü, rü ñoma taxtü i taxüärü naxnecüchicutëxerüü tá namuxüchi. ⁹ Rü ngëmaãcü i Chatanáärü churaragü rü tá ñoma i naãneärü tagu ninguuchi. Rü tá Tupanaärü duüxügüxü rü yima ñãne ya Tupana nüxü ngechaxüne ya Yerucharéüxü ínachoeguãchi.

Naturü Tupana rü daxüwa tá nanayixêê ya üxü, rü yimamaã tá nixae i guxüma i ngêma namaã rüxuanügüxü. ¹⁰ Rü ngêma ngoxo i ngêma duüxügüxü womüxêêxü, rü nawa tá natáe ya yima naxtaa ya üxümaã iyaurachiüne ya azufremaã ixaxüne. Rü yima nixĩ ya naxtaa ga marü nawa nawoüne ga yema nüxĩraüxü ga ngoxo rü yema to ga ngoxo ga orearü uruñneta ixixü. Rü yima naxtaawa tá nixĩ i guxügutáma ngunecü rü chütacü ngüxü yangegüxü.

Ngêma taxü i tochicaxü i cómuxüwa rütocüpêxewa nangugü i duüxügü

¹¹ Rü ñuxüchi nüxü chadau ga wüxi ga taxü ga tochicaxü ga cómuxü, rü nüxü chadau ga guma nawa rütocü. Rü gumachaxwa nibuxmü ga ñoma ga naãne rü guxüma ga daxüwa nüxü idauxü, rü inayarütauxe. ¹² Rü nüxü chadau ga yema yuexü ga yaexü rü buexü ga Tupanapêxegu chigüxü. Rü ningena ga poperagü. Rü yexgumarüü ta ningena ga yema Tupanaârü popera i nagu yawügüxü i ngêma duüxügü i nüxü nangêxmaxü i maxü i taguma gúxü. Rü yema yuexü rü yexgumarüü ga ñuxãcü na namaxêxü ga wüxichigü rü yexgumarüü ga ñuxãcü na yema poperawa inaxümatüxüürüüãcüma Tupana namaã nüxü nixu na ngextá tá naxixü. ¹³ Rü yema yuexü ga taxtü ga taxüwa yexmagüxü rü wenaxârü inarüdagü. Rü yema yuexü ga tauquewa yexmagüxü rü wenaxârü inarüdagü. Rü yemaãcü inarüdagü ga guxüma ga duüxügü ga yuexü. Rü guxüma ga yema yuexü rü Tupana nüxna nicachigü rü yexgumarüü ga ñuxãcü na

namaxêxũ ga wũxichigũ rü namaã nüxũ nixu na ngextá tá naxĩxũ. ¹⁴ Rũ yemawena rü guma naxtaa ga üxümaã iyaurachiünewa nawoũ ga yu guxũma ga norü poramaã. Rũ guma naxtaa ga üxümaã iyaurachiüne, rü ngẽma nixĩ i poxcu i taguma iyacuáxũ i tümacèx ixĩxũ ya yíxema tama Tupanaãrũ duũxũgũ ixĩgũxe. ¹⁵ Rũ guma naxtaa ga üxümaã iyaurachiünewa tawoũ ga guxema ingeégaxe nawa i ngẽma Tupanaãrũ popera i nagu tiwügũxũ ya yíxema tüxũ nangẽxmaxẽ i maxũ i taguma gúxũ.

21

Ngexwacaxũxũ i ñoma i naãne rü guxũma i daxũwa ngẽxmaxũ

¹ Rũ yemawena nüxũ chadau na nayexwacaxũxũ ga ñoma ga naãne rü guxũma ga tacü ga daxũwa yexmagũxũ. Yerü yema nüxĩra yexmagũxũ rü marü nangupetü, rü yema taxũ ga taxtũ rü marü nataxuma. ² Rũ nüxũ chadau ga guma ããne ga mexũne ga Yerucharéũ ga yexwacaxũne ga daxũguxũ ga naãnewa Tupanaxütawa írũxĩxũne ga guxũwama mexẽchine ñoma wüxi i pacü i ngẽxguma iyangĩxgu rü ngĩtecèx ngĩgũ mexẽxcürüũ ixĩxũne. ³ Rũ nüxũ chaxĩnü ga wüxi ga naga ga yema tochicaxũwa inaxũxũ ga tagaãcü ñaxũ:

“Tupana rü duũxũgütanüwa nangexma i ñuxmax. Rũ natanüwa tá namaxêcha. Rũ nümagü rü norü duũxũgũ tá nixĩgũ. Rũ nüma ya Tupana rü natanüwa tá nangẽxmaêcha, na guxũguma norü Tupana yiĩxũcèx. ⁴ Rũ nüma tá ínanapi i naxgüũëtü i guxũma i ngẽma duũxũgũ. Rũ marü tãütáma texé

tayu, rü texé tümaãrü ngechaũmaã taxaxu, rü texé ngúxũ tingegü. Erü guxũma i ngẽma ngúxũ rü marü inayarüxo”, ñanagürü. ⁵ Rü guma yema tochicaxũwa rütocü rü ñanagürü:

“Düçèx, choma rü chanangexwacaxũxẽẽ i guxũma i tacü i ngẽxmaxũ”, ñanagürü. Rü ñuxũchi ñanagürü ta:

“¡Naxümatü i ñaã ore! Erü ñaã ore rü aixcüma nixĩ, rü ñaã nixĩ i ore i mexũ na yaxõxũ”, ñanagürü. ⁶ Rü yemawena rü ñanagürü choxũ:

“Ñuxma rü marü ningu i guxũma. Rü chowa nixĩ ga inaxügüxũ ga guxũma, rü nataxuma i tacü i chorü yexera ngẽxmaẽchaxũ. Rü yixema itawaxe, rü choma rü tá nangetanüãcüma tüxũ chaxaxẽẽmare nawa i ngẽma dexá i maxẽẽruũ. ⁷ Rü yixema nüxũ rüporamaẽgüxe i chixexũ, rü tá tanayauxgü i guxũma i ngẽma mexügü i nüxũ chixuxũ. Rü choma rü tá tümaãrü Tupana chixĩ, rü tüma i chauxacügü. ⁸ Natürü ngẽma muũxũ i nüxũ rüxoexũ na chowe naxĩxũ, rü nawa tá nawoũ ya yima naxtaa ya üxümaã iyaurachiüne ya azufremaã ixaxüne. Rü ngẽxgumarüũ ta i ngẽma tama yaxõgüxũ, rü ngẽma chixexũ ügüxũ, rü ngẽma máẽtagüxũ, rü ngẽma naĩ i ngemaã ipexũ, rü ngẽma iyuüxũ rü ngõxwèxegüxũ, rü ngẽma tupanetachicünèxãxũ icuèxüügüxũ, rü ngẽma idorateèxgüxũ, rü nawa tá nawoũ ya yima naxtaa ya üxümaã iyaurachiüne ya azufremaã ixaxüne. Rü ngẽma nixĩ i poxcu i taguma iyacuáxũ i nüxũ ínanguxẽẽxũ i ngẽma tama yaxõgüãcüma yuexũ”, ñanagürü.

Yexwacaxüne ga Yerucharéüchiga

⁹ Rū yema 7 ga orearū ngeruŭgū ga nūxŭ yexmagūxŭ ga 7 ga copagū ga yema 7 ga poxcu-ruŭmaã ixããcuxŭ, rŭ yematanŭwa rŭ wŭxi ga orearū ngeruŭ rŭ chauxcèx nixŭ, rŭ ñanagŭrŭ choxŭ:

“¡Nuã naxŭ! Rŭ tá cuxŭ nūxŭ chadauxêê i ngêma yaxôgŭxŭ i ñoma namèxrŭŭ tá ixīgŭxŭ ya yima Tupana Nane ga pecaduarŭ ŭtanŭcèx yucŭ”, ñanagŭrŭ. ¹⁰ Rŭ yexguma yemaãcŭ Tupanaãê i Ŭŭnexŭ choxŭ ngoxetŭxêêgu, rŭ yema orearŭ ngeruŭ rŭ wŭxi ga mèxpŭne ga taxŭnewa choxŭ naga. Rŭ choxŭ nūxŭ nadauxêê ga guma ãne ya ŭŭnene ga Yerucharéŭ ga daxŭguxŭ ga naãnewa Tupanaxŭtawa írŭxŭxŭne. ¹¹ Rŭ guma ãne rŭ Tupanaãrŭ yauracŭxŭmaã nangóone. Rŭ yema norŭ yauracŭxŭ ga guma ãne rŭ ñoma wŭxi ya nuta ya mexêchicŭrŭŭ nixŭ. Rŭ ñoma nuta ya yasperŭŭ nixŭ na yachipetŭxŭ. ¹² Rŭ guma ãne rŭ guxŭwama ínapoxegu. Rŭ nataxŭchi rŭ namáchanexŭchi ga yema norŭ poxeguxŭ. Rŭ yema norŭ poxeguxŭ rŭ nūxŭ nayexma ga 12 ga norŭ ãx. Rŭ wŭxichigŭ ga yema ãxwa nayexma ga wŭxi ga Tupanaãrŭ orearŭ ngeruŭ. Rŭ wŭxichigŭ ga yema ãxwa nangoxéga ga wŭxichigŭ ga yema 12 ga Acobu nane ga Yudŭgŭ nawa ne ŭxŭ. ¹³ Rŭ tomaêxpŭx ga norŭ ãx rŭ napêxewaama nayexma, rŭ yema to ga tomaêxpŭx rŭ norŭ toxwecŭwawa nayexma, rŭ yema to ga tomaêxpŭx rŭ norŭ tŭgŭnecŭwawa nayexma, rŭ yema to ga tomaêxpŭx rŭ naweama nayexma. ¹⁴ Rŭ guma ãneãrŭ poxeguxŭ, rŭ 12 ga nuta ga taxŭchicŭétŭwa inaxŭgŭ. Rŭ wŭxichigŭ ga guma nutagŭwa nangoxéga ga wŭxichigŭ

ga norü ngúexügü ga guma Tupana Nane ga pecaduarü ütanüçèx yucü. ¹⁵ Rû yema orearü ngeruü ga chomaã idexaxü, rü nüxü nayexma ga wüxi ga norü ngugüxü ga uirumenèxãnaxcèx na yemamaã nangugüãxüçèx ga guma ããne, rü norü ããxgü, rü norü poxeguxügü. ¹⁶ Rû guma ããne rü nawüxigumare ga guxüçüwawa. Rû norü mèx rü nawüxigumare namaã ga norü tatachinü. Rû yema orearü ngeruü rü yema uirumenèxãmaã nanangugü ga guma ããne. Rû 2,200 kilómetru nixĩ ga norü mèx. Rû yexgumarüü ta 2,200 kilómetru nixĩ ga norü tatachinü. Rû 2,200 kilómetru ta nixĩ ga norü máchane. ¹⁷ Rû yemawena rü inanangu ga yema norü poxeguxü ga guma ããne. Rû 65 metru nixĩ ga norü máchane. Rû yemaãcü duüxügüarü ngugüxümaã nanangugü. ¹⁸ Rû yema norü poxeguxü ga guma ããne, rü nuta ga mexèchicü ga yaspénaxcèx nixĩ. Rû nümatama ga guma ããne rü uirunaxcèx nixĩ. Rû ñoma woruarüü niyauracüü. ¹⁹ Rû guma nutagü ga itacü ga norü poxeguxüpara ixügücü, rü nagúxüraüçü ga nuta ga imexèchicümaã nangèxãê. Rû guma nüxüraüçü ga napara rü nuta ga yaspemaã nangèxãê. Rû guma norü taxre ga napara rü nuta ga safirumaã nangèxãê. Rû guma norü tomaëxpüx ga napara rü nuta ga ágatamaã nangèxãê. Rû guma norü ägümücü ga napara rü nuta ga esmerádamaã nangèxãê. ²⁰ Rû guma norü wüximëxpüx ga napara rü nuta ga onichemaã nangèxãê. Rû guma norü 6 ga napara rü nuta ga cornalínamaã nangèxãê. Rû guma norü 7 ga napara rü nuta ga crisólitumaã nangèxãê. Rû guma norü 8 ga napara rü nuta ga berilumaã nangèxãê. Rû

guma norü 9 ga napara rü nuta ga topásiumaã nangèxãê. Rü guma norü 10 ga napara rü nuta ga crisoprásamaã nangèxãê. Rü guma norü 11 ga napara rü nuta ga yachítumaã nangèxãê. Rü guma norü 12 ga napara rü nuta ga amatístamaã nangèxãê. ²¹ Rü yema 12 ga norü ìãx ga guma ìãneärü poxeguxü rü perlanaxcèx nixí. Rü wüxichigü ga yema ìãx rü wüxitama ga perla nixí. Rü yema norü ítamü ga guma ìãneärü ngãxüwa dapetüxü, rü uiruxicanaxcèx nixí. Rü ñoma woruarü niyauracü. ²² Rü guma ìãnewa rü taxúnema ga ngutaquëxepataxü ga ngextá Tupanaxü nawa yacuëxüügünexü chadau, yerü nümatama ga Tupana ya poracü rü Nane ga pecaduarü ütanücèx yucü rü yéma nayexma na duüxügü nüxü icuëxüügüxcèx. ²³ Rü yima ìãne rü taxucèxma üèxcü rü tauemacü nüxü nabaxi, erü Tupanaärü ngóonexütama nixí i nangóonexëëxü. Rü yima Tupana Nane ga pecaduarü ütanücèx yucü nixí ya norü omü ixícü. ²⁴ Rü ngëma Tupanaärü ngóonexü i yima ìãnexü ngóonexëëxü tá nixí i nangóonexëëxü naxcèx i guxüma i ñoma i naãnecüãx i duüxügü. Rü ngëma tá nangugü i guxüma i nachiüãnegüarü ãëxgacügü i yaxögüxü rü tá Tupanana nayana i norü mexügü. ²⁵ Rü norü ìãxgü rü tagutáma narüwãxtagü erü ngëma rü guxüguma nangunexecha rü taguma nachüta. ²⁶ Rü ngëma tá nanana i guxüma i ñoma i naãneärü mexügü. ²⁷ Natürü tagutáma ngëxma naxücu i tacü i Tupanapëxewa chixexü, rü bai ya texé ya chixexü úxe rü ëxna idoratëxáxe. Rü yíxema Tupana Nane ga pecaduarü ütanücèx yucüarü

poperawa ngoxégagüxexicatátama tixĩgü ya ngëxma chocuxe.

22

¹ Rü ñuxüchi ga yema orearü ngeruü rü choxü nüxü nadauxëë ga wüxi ga natü ga metacüchiüxü rü ichipetüchiüxü ga dexá ga maxëëruü. Rü yema tochicaxü ga nawa natogüxü ga Tupana rü Nane ga pecaduarü ütanücèx yucü, rü nawa nixĩ ga ne nadaxü ga yema natü. ² Rü guma ãñeärü ngãxüwa dapetüxü ga ítamñarü ngãxügu nida ga yema natü. Rü norü guxücutüwa narüxügü ga naĩgü ga maxëëruü. Rü yema naĩgü rü wüxicanatama naxo ga wüxichigü ga tauemacügu rü yemaäcü 12 éxpüxcüna naxo ga wüxi ga taunecügu. Rü naätügü ga yema naĩgü, rü guxü i nachiuñanecüãx i duüxügü i yaxögüxüärü taãexëëruü nixĩ. ³ Rü ngëma rü nataxütáma i tacü i Tupana chixexü namaã naxuxuchixü. Rü yima ãñewa tá nangëxma i norü tochicaxü ya Tupana rü Nane ga pecaduarü ütanücèx yucü. Rü norü duüxügü rü tá nüxü nicuèxüügü. ⁴ Rü ngëma norü duüxügü rü tá nachiwexüchixü nadaugü, rü tá naegamaã nixãegacatü. ⁵ Rü ngëma rü tagutáma nachüta. Rü ngëma norü duüxügü, rü taxucèxtáma nanaxwèxe i daparina rü éxna üèxcü na nangóonexüçèx. Erü nümatama ya tórü Cori ya Tupana rü tá nüxü nabaxi. Rü nümagü i ngëma duüxügü rü guxügutáma wüxigu Tupanamaã ãëxgacügü nixĩgüecha.

Marü ningaica na wena núma naxüxü ya Ngechuchu ya Cristu

⁶ Rū ñuxũchi ga yema Tupanaãrũ orearũ ngeruũ rũ ñanagürũ choxũ:

“Ñãã ore rũ aixcũma ixĩxũ nixĩ, rũ ñãã nixĩ i ore i mexũ na yaxõxũ. Rũ nüma ya tórũ Cori ya Tupana ga nuxcũma norũ orearũ uruũgũmaã nüxũ ixucũ ga tacũ tá na ngupetũxũ, rũ nümatama nixĩ i ñuxma inamuãxũ i norũ orearũ ngeruũ i daxũcũãx na norũ duũxũgũxũ nüxũ nadauxẽẽxũcèx na tacũ tá paxa nangupetũxũ”, ñanagürũ. ⁷ Rũ nüma ya tórũ Cori ya Ngechuchu rũ ñanagürũ:

“Paxa tá íchangu. Rũ tataãẽ ya yíxema naga ñnuxẽ i ngẽma Tupanaãrũ ore i ñãã poperagu ümatũxũ”, ñanagürũ. ⁸ Rũ chomatama i Cuáũ rũ nüxũ chaxĩnũ rũ nüxũ chadau i guxũma i ngẽma nüxũ chixuxũ. Rũ yemaxũ chaxĩnũguwena rũ nüxũ chadẽuxguwena, rũ yema orearũ ngeruũ ga yemaxũ choxũ dauxẽẽxũpẽxegu chacaxãpũxũ na nüxũ chicuèxũxũcèx. ⁹ Natürũ ga nüma rũ ñanagürũ choxũ:

“¡Tãxũ i ngẽma cuxũxũ! Erũ choma rũ ta Tupanaãrũ duũxũ chixĩ, ngẽxgumarũ i cuma rũ cueneẽgũ i Tupanaãrũ orexũ ixugũxũ rũ ngẽma duũxũgũ i naga ñnũxũ i ngẽma ore i ñãã poperagu ümatũxũ. Rũ name nixĩ i Tupanaxũ quicuèxũ”, ñanagürũ. ¹⁰ Rũ ñanagürũ ta choxũ:

“Tama name na icuyacúxũ i ngẽma Tupanaãrũ ore i ñãã poperagu ümatũxũ, erũ marũ ningaica na yanguxũ i ngẽma ore. ¹¹ Natürũ ngẽma chixexũ ügũxũ, rũ chixexũ tá naxũgüecha. Rũ ngẽma Tupanapẽxewa chixri maxẽxũ, rũ chixri tá namaxẽẽcha. Natürũ yíxema mexũ ügũxe, rũ name nixĩ na mexũ taxũgüechaxũ. Rũ yíxema

Tupanapêxewa ixüünexê, rü name nixĩ na Tupanapêxewa tixüüneêchaxũ”, ñanagürü. ¹² Rü ñanagürü ga Ngechuchu:

“Dücèx, paxa tá íchangu namaã i ngêma ãmare i wüxichigüna tá chaxãxũ ngêxgumarüü na ñuxãcü tanaxüxũ i tümax. ¹³ Choma nixĩ i norü ügü i guxüma, rü chowa nixĩ i yacuáxũ erü nataxuma i ñacü i choweama üxũ. ¹⁴ Rü tataãëgü ya guxãma ya yíxema yima pecaduarü ütanücèx yucügüwa tügü iyauxgüchiruxe na Tupanapêxewa timexücèx na yima ñãneãrü ñãxwa tichocuxücèx rü nüxũ tangõxnetagüxücèx i ngêma norü o i ngêma naĩ i maxêëruü. ¹⁵ Natürü täütáma yima ñãnewa nichocu i ngêma tama yaxõgüxũ, rü ngêma iyuüxũ rü ngõxwèxegüxũ, rü ngêma naĩ i ngemaã ipegüxũ, rü ngêma máëtagüxũ, rü ngêma tupananetachicünèxãxũ icuèxüügüxũ. Rü ngêxgumarüü ta i ngêma idoratèëxgüxũ i norü me ixĩxũ na togüxũ nawomüxëëgüxũ, rü täütáma nawa nichocu ya yima ñãne. ¹⁶ Rü choma i Ngechuchu, rü guxãma i pema i yaxõgüxũtanüwa chanamu i chorü orearü ngerüü na pemaã nüxũ yaxuxücèx i guxüma i ngêma chorü ore. Rü choma nixĩ i Dabítaa chiixũ. Rü choma nixĩ ya yima woramacuri ya pèxmama poraãcü nangóonexëëcürüü chiixũ”, ñanagürü. ¹⁷ Rü Tupanaãë i Üünexũ rü guxüma i yaxõgüxũ, rü Ngechuchuxũ ñanagürügü:

“¡Nuã naxũ!” ñanagürügü. Rü yíxema nüxũ ñnuxê i ñãã ore, rü:

“¡Nuã naxũ!” ñatagügü. Rü yíxema itawáxe rü tüxũ nachixégaxe, rü name nixĩ i nuã taxũ rü tüxũ nangetanüãcüma nawa taxaxe i ngêma dexá

i maxëëruü. ¹⁸ Rû guxãma ya yíxema irüxĩnüëxë i ñãã Tupanaãrû ore i ñãã poperagu ümatüxü, rû tümamaã nüxü chixu rû ngëxguma chi texé íyatóxëëgu i ngëma Tupanaãrû ore i ñãã poperagu ümatüxü, rû Tupana rû tá tümacèx nanayexeraxëë i ngëma poxcuruügü i ñãã poperawa nachiga naxümatüxü. ¹⁹ Rû ngëxguma chi texé nüxü üpetügu i wüxitama i ñãã Tupanaãrû ore i ñãã poperagu ümatüxü, rû Tupana rû täütáma tüxü nüxü nangoxnetaxëë i ngëma norü o i ngëma naĩ i maxëëruü i ñãã poperawa nachiga naxümatüxü. Rû ngëxgumarüü tá ta täütáma tüxü nimucuchi nawa ya yima ñãne ya üünene i ñãã poperawa nachiga naxümatüne. ²⁰ Rû yima nüxü ixucü i ñãã ore, rû ñanagürü:

“Ngëmaãcü, paxa tá íchangu”, ñanagürü. Rû ngëmaãcü yĩ. Rû choma i Cuáü rû ñacharügü:

“¡Nuã naxü Pa Cori ya Ngechuchu!” ñacharügü. ²¹ Rû chanaxwëxe i tórü Cori ya Ngechuchu ya Cristu poraãcü pexü narüngüxëë i guxãma i pemax. Rû ngëmaãcü yĩ.

**Tupanaarü Ore i Tóru Cori ya Ngechuchu ya
Cristuchiga
New Testament in Ticuna (PE:tca:Ticuna)**

copyright © 2008 Wycliffe Bible Translators, Inc.

Language: Ticuna

Translation by: Wycliffe Bible Translators, Inc.

Ticuna

tca

Peru

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Ticuna

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 22 Feb 2024 from source files dated 29 Jan 2022

9d5dc22a-30be-5d26-85a9-76047f4c89e6